

XTIIDZ NDZON DIOS MIÑE PQUIAA MATEW

¹ Jesús meñ ne pxeel Dios ga, lo xtii Abraham, lo xtii David, ga brieequia me. Lëë grë xmenğoldoo me nu:

² Abraham goc pxoz Isaac,
Isaac goc pxoz Jacob,

Jacob goc pxoz Judá (bio zla xpëed Jacob),

³ Judá goc pxoz Far ni Zar (Tamar brieelë tsiel Judá),

Far goc pxoz Srom,
Srom goc pxoz Aram.

⁴ Aram goc pxoz Minadab,
Minadab goc pxoz Naasón,
Naasón goc pxoz Salmon.

⁵ Salmóngoc pxoz Booz (Rahab brieelë tsiel Salmon),

Booz goc pxoz Obed (Rut brieelë tsiel Booz),
Obed goc pxoz Isaí.

⁶ Isaí goc pxoz rey David,
David goc pxoz Salomón (lëë Salomón ga gop tsiel Urí wnaa ne bionie David).

⁷ Salomón goc pxoz Roboam,
Roboam goc pxoz Abí,

Abí goc pxoz Asá,

⁸ Asá goc pxoz Josafat,
Josafat goc pxoz Joram,

Joram goc pxoz Uzí.

⁹ Uzí goc pxoz Jotam,

Jotam goc pxoz Acaz,
Acaz goc pxoz Ezequí.

¹⁰ Ezequí goc pxoz Manasés,
Manasés goc pxoz Amón,

Amón goc pxoz Josí,

¹¹ Josí goc pxoz Jeconí (bio zla xpëed Josí).

Leñ dze ne nac Jeconí mëed, leñ dze co güeybee
zhoo zha Babiloin grë zha Israel, beynie zho zho
Babiloin.

¹² Babiloin, ga gol tib xpëed Jeconí brieelë Salatiel,
Salatiel goc pxoz Zorobabel.

¹³ Zorobabel goc pxoz Abiud,
Abiud goc pxoz Liaquim,

Liaquim goc pxoz Azor.

¹⁴ Azor goc pxoz Sadoc,
Sadoc goc pxoz Aquim,

Aquim goc pxoz Liud.

¹⁵ Liud goc pxoz Leazar,
Leazar goc pxoz Matán,

Matán goc pxoz Jacob.

¹⁶ Jacob co nagon goc pxoz José, meñ ne ptsieelnia
Marí.

Marí goc xníaa Jesús, Meñ ne nacle diidz ga cxeel
Dios guiaad lo guidzliu.

¹⁷ Zig choopchop bdziñ lo dii co, dzigoraa brie-
quia Jesús. Tsiida zho wban desde Abraham haxta
David; stsiida zho wban desde Salomón haxta leñ
dze ne bey zho Babiloin; stsiida zho wban desde
leñ dze co haxta bdziñ dze ne goc me mëed.

Gol Jesús

(Lc. 2:1-7)

¹⁸ Znu bzhaac Marí grop José leñ dze ne zi-
aadyob gal Jesús. Gard ctsieelnia Marí loxaque

xtiidz me no ne laa me ycaa José, zeene bnabey Espíritu Sant pquialo tib mēēd zdoo me.

¹⁹ Zeene bien Joséw, miñe been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhlianse nzozit me, sacne racladzd me nriee xquielto Marí.

²⁰ Zhgab co no me, tibaque blulo tib xanjl Dios lo me lo mcaal.

—José (xiag David) —rēb anjl co—, peet tsienied guic luu, pcaania Marí gac me tsieel luu; sac gon mēdyeen ne zoney me ga, Espíritu Sant bnabey pquialo win zdoo me.

²¹ Zeene gal dze ne laa win gal, JESUS cueelē luu win, sca grieelē win sac win csilaa grē menladz win lo dol.

²² Ga brieequia miñe bnee Dios padzeela, zeene bzeet zha ne biadnee xtiidz mew, rēb zho:

²³ Bii zan to ganle zeene laa tib mēēdbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelē win.

(Emanuel nac zig nace rnee ne: Dioszhal ziaad lo ne.)

²⁴ Zeene bna José laa guic me goc tibli; bin me xtiidz anjl co laa me ptsieelnia Marí.

²⁵ Laa me wban tipse grop me per ib bgaald me Marí, haxta bded dze ne laa mēdyeen co gol. Bdziñ dzew, laa win gol, dzigo bleelē José win JESUS.

2

Güeygan bla zha rac Jesús

¹ Tib guiedz win ne ndxie xtan Judé lë Belén, ga gol Jesús. Lëetse len dze co zob meñ ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ngbidz bdziñ Jerusalén,

² bñabdiidz zho rëb zho:

—¿Pa lo dien no mëed ne gac meñ ne gnabey ladz to nu, mëed ne griiñ gol ga? Bdzioñ no tib mel nëz ne no no, mel co blu lo no laa win gol-le, miñ co ne ziaad no nu ziaaddziañ no win.

³⁻⁴ Grë menquiedz Jerusalén, zeene bin zhow bzee zdoo zho. Laa Herod, rienndraa me zha gun me, bnabey me pcaalsa grë zha ne nac pxoz non, grë zha ne rseed miech ley, bñabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga.

⁵ Dzigo rëbchaa zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

⁶ Tel Belén,

niicle ne winraaw lo grë guiedz ne ngab Judé, per nroob nona;
sac gon ga grieequia tib meñ ne gnabey,
meñ ne so yquiaanap grë meñ Israel, ne nac zho zha ne ngab lo naa.

⁷ Nacne zhliaanse bnabey Herod gocredz gza zha rac co, bñabdiidz me lo zho dien blapaa dze rac psilo gon zho blan mel co.

⁸ Blozhse ga, dzigo pxeel me zho Belén, rëb me lo zho:

—Ga gołtsie gołtsieguib mēēd co. Zigne gdziel to win, gołtēniegagh diidz lo naa nu, zeēna ye naa ga gagan naa win.

⁹ Blozhse sca pso me diidz lo zho, laa zho bio nēz stib laa zho zie. Laa mel ne gon zho brieequia nēz ne ziaad zho ga, laa ma neraque lo zho; haxta bdziñ ma ngali guic yu ne no mēdyeen co, gataa laa ma blēz.

¹⁰⁻¹¹ Zeēne gon zho laa mel co blēz ga, per nli rley zho. Bzēēb zho leñ yu co, gon zho laa mēdyeen co no ga grop xniaa win, dzigo pquitsgzhib zho lo win, bnee zho tib xtiidz zho lo win. Blozh ga blee zho ncuaane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

¹² Zeēne laa gza zha rac co wbi Belén, laa ne nieted zho Jerusalén, stible nēz bzheñ zho zey zho; sac bnee Dios lo zho lo mcaal, rēb me tsienied zho diidz lo Herod.

¹³ Laa gza zha rac co zey, zeēne güeylulo tib xanjł Dios lo José lēētse nixguies me, rēb anjł co lo me:

—José, na zeēna guche i pcaanie mēdyeen qui nēz grop xniaa win, gołsē nēz Egipt, sac laa Herod yquiaguib win gut me win. Egipt, ga cuēznie to win, na naaque guialñie diidz lo to zeēne laa to gbi ga.

¹⁴ Guieel cogazh guche José, pcaanie me mēdyeen co nēz grop xniaa win, laa zho ziese nēz Egipt;

¹⁵ ga blēz me haxta bdziñ dze ne laa Herod gut. Ga brieequia miñe bnee zha ne biadteed xtiidz Dios padzeela, zeēne znu bnee zho: “Nēz Egipt no xpēēd naa, zeēne bredz naa me.”

Bnabey Herod gut grë mēēdlas

¹⁶ Laa zeene goṇ Herod wbiredraa gza meṇ rac co nienie zho diidz lo me, per nli blēē me. Ntseeb rac me, pxeel me zha ne güey Belén ni grēraa guiedz ne ndxie gax ga, güeygut zho grēse mēēdbgui yeen ne no grë guiedz co, desde win ne golnēz, haxta win ne rap chop iz. Tibaque naṇ me sca ngaa mēdyeen ne nac Jesús ga niet win, sac blee me cuent zhile gac chop iz psilo goṇ gza zha rac co blan mel co.

¹⁷ Guielñēdox ne bio grë miech co, ga brieequia miṇe bzeet Jeremí meṇ ne biadteed xtiidz Dios padzeela, zeene znu rēb me:

¹⁸ Tib redz nroob ne zēēb leṇ guiedz Ramá. Grë wnaa Judá, zha ne ziaad lo xtii Raquel, mbanse rac zho, roon zho no zho xquielñē xpēēd zho; zha rna zha ne cchoobladz zdoo zho, sac laa xpēēd zho gut.

¹⁹ Goc palal dzew laa Herod gut, dzigo pxeel Dios tib xanjl me güeynee lo José lo mcaal zaatne no José nēz Egipt, rēb me lo José:

²⁰ —José, guche i, pcaanie mēdyeen qui nēz grop xniaa win, golbire nēz Israel stib; laa zha ne quianaṽ win ga gutle.

²¹ Dzigo brieenie José mēdyeen co ga grop xniaa win, bio me nēz laa me wbire zeynie win nēz Israel.

²² Per zeene bin José lēēque tib xpēēd Herod meṇ ne lē Arquelá, meṇ co biaan xlugar Herod zobnabey xtan Judé, bdzieb José ndzinne me mēdyeen co nēz co. Dzigo bneeque Dios lo me lo mcaal tsie me nēz Galilé.

²³ Gol zho Galilé, bdzinaque zho guiedz Nazaret, ga wbannie zho mëdyeen co. Ga briequia mine bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

3

Psilo Juan Bautist noseed me miech

(Mr. 1:1-8; Lc. 3:1-9, 15-17; Jn. 1:19-28)

¹ Len dze ne psilo Juan Bautist noseed Juan miech xtan zha Judé, dan zit ne no me ga;

² rnee me lo zho:

—iGolsaan xquie_lntseeb to, gol_nab lo Dios gun me to perdon grëtaa dol ne ziyun to; sac gon laa dze bdzinle laa me csilo gnabey!

³ Lëë Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëëb tib dan zit, rnee me:

“Golzhixcuuaa nëz ne ted men ne rnabey, golsaan grë guie_lntseeb ne run to.”

⁴ Niapse guits lad camell niaa xab Juan, guid nac ncuane ndxie len me, ni niapse nguzhanch ni dzin dan row me.

⁵ Nzian grë men_guiedz Jerusalén, grë men Judé, grë men ne no gax ro guiubee Jordán, rree zho riequiaadiag zho zhiwseed me.

⁶ Grë zha ne rxobdol grëse xtol zho, dzigo rchoobnis me zho ro guiubee co.

⁷ Laa zeene ran me grë zha farisé, zha saducé ne rdzin lo me ga racladz zho ye zho chobnis, dzigo rnee me lo zho:

— ¡Miech ngoopdol, masaque nac to zig nac meel! Nan to na lëe, loxaque chobnis to laa to laale lo grë guielnëdox ne ziaadyob.

⁸ Led scada gon, none zaacse gban to zeena glu nli dib zdo to psaan to grë xquielntseeb to.

⁹ Ni gacniatsde to guiab to loxaque por nacse to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham.

¹⁰ Nanle to ganle, grë yag nex, zeene rquiad nex low led rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rrieequia laa me nzhenle xquibyag me cchug me yag ne sca nac.

¹¹ 'Nli tib wrobnisse nu rnedz naa lo to, nacsow zig tib señ, sac lëe gdib rluw laa to psaan xquielntseeb to, laa to bzëeb xnëz Dios. Sangue men ne no guiaad ga, mesi Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa.

¹² Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdziind dze guiuuw.

Brobnis Jesús
(Mr. 1:9-11; Lc. 3:21-22)

¹³ Leṅ dze co brieē Jesús nēz Galilé zie me nēz ro guiubee Jordán, laa me zie par cchoobnis Juan me. Bdziṅ me

¹⁴ nēd Juan cchoobnis Juan me, rēb Juan lo me:
—Lēda i goṅ, naa none guial lo luu cchoobnis luu naa.

¹⁵ Dzigo rēb me lo Juan:
—Nli scaw, per mazd pchoobnis naa, sac goṅ ib nonguiela dziuun ne miṅe rnabey Dios.

Dzigoraa pchoobnis Juan me.

¹⁶ Laa me zieriee lo nis zeēne laa zhan gbaa bzhial, goṅpaa me zig rlu tib palom rlu Espíritu Sant laa me ziad-zēēb bdziṅ me guic me,

¹⁷ ni blu zēēb tib tsi meṅ co nēz gbaa rnee me:
—Xpēēd naa goṅ nac meṅ qui, rleynie naa me, meṅ nziuu nac me lo naa.

4

Gocladz mēdox niuṅgüet ma Jesús

(Mr. 1:12-13; Lc. 4:1-13)

¹ Zeēne blozh brobnis Jesús, dzigo güeynie Espíritu Sant me tib dan zit, zaatne guiēnd miech; ga gocladz mēdox niuṅgüet ma me niuṅ me miṅe racladz ma.

² Zeēne goc choo ngbidz choo guieel no me dan co ni tib lē peet rowd me, laa me pcaabedz

³ hor co bdziṅ mēdox zaatne no me ga, rēb ma:
—Telne nli Xpēēd Dios nac luu, bnabey tsaalo grē quie riī ncuaaṅe gow luu.

⁴ Dzigo pquiab me rēb me lo ma:
—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

⁵ Blozh ga güeynie ma me Jerusalén, blep ma me glaa guic yadoo nroob ne zob lad guiedz co,

⁶ rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanjl me yquiaanap luu, zha queedz luu, zeena ni tib quie ycaand ni luu.”

⁷ Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bien, Dios nac meñ ne rnabey luu, nodne quitnie luu me gnab luu lo me ncuaane nod gun me.”

⁸ Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co,

⁹ rëb ma lo me:

—Bui ganle, grëse ncuaan qui gon gnedz naa lo luu telne squiitsgzhil luu lo naa niina, gunnon luu naa.

¹⁰ Horco pquiab me rëb me lo ma:

—iBiche lo naa nu mendox! Znu gon zhobnee lo Xtiidz Dios: “Diosse nac meñ ne rnabey, mese none gunnon luu, lo me rieguaial yquiitsgzhil luu; ni mine rnabey me min co none gun luu.”

¹¹ Dzigoraa biche ma lo me, dzigo bdziñ bla anjl bdeed zho ncuaane dow me.

Psilo Jesús pseed me miech nëz Galilé

(Mr. 1:14-15; Lc. 4:14-15)

¹² Zeene bin Jesús laa Juan biab ladzguiib, dzigo brie me ga güey me nëz Galilé, guiedz ne lë Nazaret.

¹³ Zhisaque goca, brieque me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí.

¹⁴ Ga briequia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

¹⁵ Grëse menzit ne ndxie xtan Galilé, nêz dan ro guiubee Jordán, gax ro Nisdoo Galilé, zaatne gocchen Zabulón ni Neftalí;

¹⁶ miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par grie zho ga.

¹⁷ Ga psilo Jesús pseed me miech, rnee me lo zho csaan zho xquientseeb zho, gbig zho lo Dios, sac laa dze ne csilo gnabey Dios ziaadgaxle.

Bredz Jesús tap ngoozme

(Mr. 1:16-20; Lc. 5:1-11)

¹⁸ Leñ dze co, tib dze zieded Jesús gax ro Nisdoo Galilé gon me chop ngoozme, tib zho lë Simón Pedr, stib zho lë Ndrés; grop bets zho lëetse laa zho noron guie x ne rgaa me lo nis.

¹⁹ Dzigo bredz me zho, rëb me lo zho:

—¡Goltë goltëna! zhits naa! ¡Laa naa cxel to tsie to stib gooz, tsietop to grë miech ne sëeb xnêz Dios!

²⁰ Horcogazh psan zho guie x ne rgaa me ga, laa zho zienal zhits me.

²¹ Zhisaque bzë me ro nis co, gon me laa Jacob ni Juan (lëe grop xingan men ne lë Zebedé ga) no tib leñ barcw gza pxoz zho, noquiaabdie zho guie x ne rgaa me; dzigo bredz me zho.

²² Zigne bredz me zho biaan nieque pxoz zho barcw ga, laa zho zienal zhits me.

Zëeb diidz grëtaa milagr ne run Jesús

²³ Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xtiidz Dios, rnee me lo zho zha racladz Dios gban zho, ni runguiac me grë men rzacnë, tel pe guielguiidztaa rzac zho.

²⁴ Tel pa lotaaw zëeb diidz scataa run me grë milagr, haxta nëz Siria bin miecha. Nzian grë men co brie ga bdziñnie zho grë zhimguidz zho lo me: no grë men rzacnë co noguitnie mendox, no zho rlan guelguidz gutye, no zho gutoo dipse xcuerp, no zho rlan grë pe stib guelguidz, nogaa zho rlan grë pe yoob; grëse zho beenguiac me zho.

²⁵ Zaatne zieetaa me, miech guizhiu ne nal zhits me, grë zha Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

5

Cho nac zha ne wen zie (Lc. 6:20-23)

¹ Tib dzew, gon Jesús laa grë miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grë xpëédscuel me lo me,

² dzigo psilo me pseed me zho, rëb me:

³ —¡Wen zie zha ne rien ib none gbig zho lo Dios, sac ib zdziñ zho zaatne rnabey me!

⁴ ¡Wen zie zha ne mban rac roon niina, sac schoobladz Dios zdoo zho!

⁵ ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

6 'iWen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabгаа zhis, sac ible zacnie Dios zho parne grieelo gun zhow!

7 'iWen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

8 'iWen zie zha ne mbele zdoo, zha ne biaanmbele lo xtol, sac zanlo zho Dios!

9 'iWen zie zha ne noxco zaacse gban miech, tild zho, sac masaque mëed gac zho lo Dios!

10 'iWen zie zha ne loxaque porne quiayun zho mine rnabey Dios, rquiana miech zho, sac ible zdzin zho zaatne rnabey me!

11 'Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne rliladz to naa, iwen zie to ga!

12 iNley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

Nac to zig nac zed, zig nac biini

(Mr. 9:50; Lc. 14:34-35)

13 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, zpa dien rquiina? iLëë gdib rliaala lo guizh, zaatne rded rzë miech rzëeni zhow!

14 'Nac to zig tib biini ne noziini lo guidzliu. Griyelod tsongueets to, sac tib guiedz ne ndxie glaa tib guic gui, griyelod tsongueetsa.

15 Goluieen ganle nacd biini parne tsolana, sinque parne gziiniw lo grë miech ne no len yu.

16 Zaacse sca golgac, miñe rquiin miñ co golgun, masaque lëew gac zig tib biini; zeena zeene gan miech biini co zien zho ganle pa lotaa meñ nroob nac Pxoꝝ to meñ ne no gbaa.

17 'Guiabde to togo bod laa naa zial zialtichee naa ley ne psan Moisés, o grëgaa miñe bnee zha ne biadteed xtiidz Dios padzeela; sac led miñcod zial naa, sinque laa naa zial gun naaw zigne no gaca.

18 Gneli naa lo to ganle: Laga niaa guidzliu rii, laga niaa gbaa, ib none gac miñe zhobnee lo ley, miñe bneegaa zha ne biadteed xtiidz Dios, ni tib lë paat gdzëëda.

19 Gacxe waa zha ne quiits tib ley niicle miñe mazdraa wina, ni cseed zho miecha zigne run zho ga, ib tedsod zha nac zha ne mazdraa win guiaan lo grë zha ne yгаа заатне rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

20 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsoxcode to gban to zigne racladz Dios, grieelod gdziñ to zaatne rnabey me.

Nodne gut miech

(Lc. 12:57-59)

21 'Led nanle to ganle, no tib ley ne biaan lo xmengol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co.

22 Sca rnee ley co, per zig nac zha ne gon në rac zdoo ran samiech, rrieequia beetle zho ga, ye zho riegual quizh falt co. Zig nac zha ne gnee pe

tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

²³ Gacxe waa tel ziesan to tib gon, per lo pcoogle zo to rsoladz to rdilnie to tib samiech to,

²⁴ gase golsan gon co, goltsie goltsienabgazh perdon lo zha ne rlëe to lo ga, gbireraa to dzigo gdeed to gon co.

²⁵ Zha ne sca rlëenie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib.

²⁶ Gnelli naa lo to ganle grieede to ga, haxtaque lozh quizh to grë dimi ne gnab wxtis lo to.

Nodne tsonie miech zha ne led tsieeld zho

²⁷ Nanlaque to ganle zha rnee stib ley ne biaan lo xmengol to, rneew: “Zha ne nole tsieel, zigtaa mguiw zigtaa wnaaw, nodne tsonie zho zha ne led tsieeld zho.”

²⁸ Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

²⁹ Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lëque xcuerp to, lëdle dib nacesew tsietsobe gabil.

³⁰ Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lëdle nitlo to len gabil dib nace xcuerp to.

Nodne csëbtsieel miech
(Mt. 19:9; Mr. 10:11-12; Lc. 16:18)

31 'No stib ley znu rnee: "Mgui ne racladz csaan tsieel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa."

32 Per gni naa lo to ganle: telne quiangobd tsieel zho stib mgui, ni rsëbtsieel zho, lëëque zha rguib ga yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

Nodne yquidie miech

33 'Ziyon to ganle zha nac stib ley ne biaan lo xmengol to rneew: "Zha ne gzeet lë Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow."

34 Per gni naa lo to ganle: nodne sca gzeet to lë Dios, per ni gbaa nodne ne sca gzeet to, sac gon ga nac zaatne zob Dios;

35 per ni guidzliu, sac lo guidzliu nac zaatne zo ni me; per ni Jerusalén, sac ga nac guiedz nroob ne rnabey me;

36 guiaabgaa to gzeet to guic to. Gunscade to, sac gon zig nac guic to, per ni tib guitsguic to grieelod csan nquits to, grieelodgaa csan ngas tow.

37 Gacxe waa ncuaane rgobey to zrieelo gun to, golguiab: "zun naaw", togo riengaa to grieeloda, golguiab: "grieeloda"; tsode to dieen cho gzeet to, sac gon led Diosdraa rnabey min co.

Nodne ctsire miech guielnë

(Lc. 6:27-36)

38 'No stib ley znu rnee: "Tel cuee zho tib bziaalo luu, guiaand luu scase bleeque stib bziaalo zho, tel cueegaa zho tib lay luu, scaque been blee stib lay zho."

³⁹ Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Teḷ cap zho lo to, tiblise golgac, ib gunde to glisauque nia to.

⁴⁰ 'Zha ne tsiezo to lo wxtis, ni lozh ga haxta gla zho xibiaagw to, golsaan güey zhow haxta xabnal to goldeed lo zho.

⁴¹ Zeene grieequia zha ne gnabey to güey to xyo zho tib grol hor, golgüeya, haxta tib hor goltsie güey tow.

⁴² Zha ne gnabtaa pe cos lo to, goldeeda; zig nac zha ne ziadtiḷ, goldeed ncuaane ziadtiḷ zho, ctsirede to zho scase.

⁴³ 'Ziyonle to ganle no zha ne znu rnee: "Zha ne rdzieel xtiidz luu bleynie zho, scagaa zha ne rlëe lo luu, blëenie zho."

⁴⁴ Per led scada gon, ḷnone zaacse gac to lo zha ne rlëe lo to! ḷzha ne rgodee to, golnab lo Dios gunlay me zho!

⁴⁵ Zeena sca glu nli xpëed meḷ ne zob gbaa nac to. Golgan ganle teḷ me rnabey me rziini ngbidz lo grëse miech, zigtaa lo zha wena, zigtagaa lo zha ntseeba; scaque nisguie me rsiaaba rquiin zho grëse zho, rbed me dieḷ cho ngable lo me, chogaa ngabd lo me.

⁴⁶ ḷGase nasca golwi! Teḷ loxaque zha ne ndzieeldiidz to zha cose rleynie to, ḷniacxe zgaa to guieḷnzaac ne gdeed Dios? Haxta zha ne mazdraa ntseeb ruḷ miḷ co.

⁴⁷ Teḷ loxaque zha ne nacse meḷlidz to, lo zha cose zaacse rnee to, ḷpe lëe guieḷwen ga na rlu to? Haxta zha ne runbeyd Dios ruḷ miḷ co.

⁴⁸ Goltsoxco sca ndzinli golgac, zigne rleynie Pxo

to (men ne zob gbaa) grëse miech, scaque none gun to.

6

Zha ne run xyudar samiech

¹ Zeene gun to xyudar samiech to, ib gunde to zaatne ndxiepaa miech ga so to glu to xquielwen to, par gan zho mine run to. Telne sca gun to, ygaade to guielnzaac ne gdeed Pxoz to men ne zob gbaa.

² Gacxe waa, zeene gun to xyudar zha ne guiend pe yquiin, gooldide tow zigne run grë zha ne rquiaalo rquia zdoo samiech; sac zha co tel pe ncuane rgad zho, rzo zho len yadoo, rzo zho ro nëz rlozhd yquiaabdzie zhow par gacnaṅpaa miecha, zeena zha ne gona guiab zho: ;Zha wentaa zha qui! ;Gneli naa lo to ganle ne sca rianṅziuu zho lo miech, lëele gdib guielnzaac ne yгаа zho ga!

³ Golguien sca, zeene gun to xyudar zha ne no tib liaadz, choot lo gzodiidzde tow, per ni zha ne mazdraa ndzieeldiudz to nodne gacnaṅa.

⁴ Dzigo scagaa Pxoz to nroob guielnzaac ne gneedz me lo to, sac tel me grësew ran me.

Zha gzodiidznie miech Dios

(Lc. 11:2-4, 34-36; 12:22-31, 33-34; 16:13)

⁵ Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganṅpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëele guielnzaac ne yгаа zho ga.

⁶ Golguien zeene gzodiidznie to me, golṣëeb len lidz to dziits golsioog ro yu, ga golzodiidznie me. Ible

tedsod nroob guielnzaac gneedz me lo to, sac niicle ncuaa_{ne} mazdraa ngeuets zhliaana, ran mew.

⁷Ni zeene nozodiidznie to me, gunde to ncuaa_{ne} nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuel_t gnee zhow dzigo squiaadiag mew.

⁸Gunscade to, sac me ne nac me Pxoz to gardle gnee to xliaadz to lo me laa me nanle pe nac ncuaa_{ne} rquiin to.

⁹Gacxe waa zeene gzodiidznie to me, znu golnee: Dios, luu ne nac luu Pxoz no, zob luu gbaa; luuse nac men ne mazdraa ndzon.

¹⁰Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

¹¹Been guielnzaac bneedz ncuaa_{ne} dioow no nadze.

¹²Bzhiguiel been no perdon grëse dol ne ziodzi-uun no lo luu, zigne rdziuun no samiech no perdon grë falt ne run zho lo no.

¹³Gdeete luu diidz yquiil mendox no, been guielnzaac bla no lo ma.

Luu nac men ne rnabey, men ne rappoder, men ne mazdraa nroob. Mine rnab no nu, ndionpaa no zun luuw.

¹⁴Sca nagon none gnee to. Ni golgona ganle, zha ne gon gun samiech zho perdon tel pe nactaa falt ne been zho lo zho, scaque Pxoz to men ne zob gbaa, zun me zho perdon.

¹⁵Zha ne gund samiech zho perdon, niicle megaa gund me perdon xtol zho.

16 'Stiba, zeene nocuan to nozodiidznie to me, gunbande to lo to. Sac grë zha ne rquiaalo miech wen nac zho, sca run zho; zeene nocuan zho xtsi-inpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëele guielnzaac ne ygaa zho ga.

17-18 Gunscade to, nguieel golgac ine golzëë biegw guic to, golquib lo to, zeena ni tib choot guiend laa to nocuan, loxaque Pxoz to gacnaa, sac grëse ncuaane rac ngeets ran mew. Grëse ncuaane rac, me raana, me nac men ne gneedz tib guielnzaac nroob lo to.

19 'Tsienalde to loxaque dien zha gapchen to lo guidzliu rii, sac nac ncuaan lo guidzliu rii rban ngbaana, rnitlo mxila, haxta noxtseeb guioochena.

20 Mazd goltsoxco ygaa to guielnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil.

21 Golgona ganle, guielnzaac ne gon gunlo to, ga glu pa gdzin xalm to, sac zaatne gunlo to guielnzaac co ga nac zaatne gdzin xalm to.

22 'Rriequia nac bziaalo to zig nac tib biini. Telne niapse lo grë ncuaane ndzinli rwi to, dzigo gdipse xcuerp to no lo guielbiini.

23 Laa telne loxaque lo grë ncuaane nonguield rwi to, dzigo gdipse xcuerp to no lo guielcow ga. ;Zha rnazhe lo guielcow co, tel lëëque biini noyac guielcow!

24 'Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

25 'Gacxe waa, gni naa lo to ganle: Tsođe to zhgab dien zha gban to lo guidzliu rii, pa griee pe gow to, pe guie to, pe gacwxabгаа to. Stiba, ¿niacxe mazdraa non guielwagw lo xquielmban to? Xabгаа tow, ¿niacxe mazdraa nona lo xcuerp to?

26 Golwi lo grē mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoз to men ne zob gbaa, men co rdeed ncuaane row ma. ¡Tel to gon, mazdraa non to lo grē mguin co!

27 Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

28 'Zig nac lar, ¿pe nacne tant tso to zhgab dien pe gacwxab to? Pe rwide to lo grē guiee ne ganle zēēb dan, zha rrooba, led yeda rio zhgab dien zha gacwxaba, per niow rnaw;

29 gni naa lo to ganle, per ni rey Salomón con grē xab niash me, blud me scataa niow.

30 'Gase na ganle golwi, niicxe grē guiee dan co na, zna dze zob nguiaw, gzhe widz laaw bidzle, laaw tseclē, ni scataa niow rgacwxab Diosa, ¿pe lel to dzigo ygacwxabd me, niicle ne squi gard guien to dib zdoo to gnalo to me?

31 'Tsođe to zhgab sca guiab to: “¿Bay pa griee pe dioow ne, pa griee pe dio ne, pa griee pe dziaacwxab ne?”

32 Grē miech ne runbeyd Dios, tibaque zhgab co rio zho. Sangue to golsoladz ganle, Pxoз to men ne zob gbaa, nanle me pe nac grē xliaadz to,

33 me nac men ne gneedz ncuaane yquiin to, per ib none glo tsoxco to gban to zigne rnabey me.

³⁴ Golguien sca tso^de to zhgab dien zha ted to gzhe widz, sac gzhe widz co zhaalague xco ne ziaad. Tib tib dze zhaase zhaase zhgab ne ziaad-niew.

7

Nodne gzee zdoo ne cho zha rac
(Lc. 6:37-38, 41-42)

¹ Blozh ga rëbcha me lo zho:

—Golguien, ib gunde to në gac zdoo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunsca^d me to.

² Sac gon tel zha rzac to samiech to, scasaque sac Dios to.

³ 'iLëda ga gon tso to lozhd gzee zdoo to dien cho pe run, ni nenda mazdraa mine run to!

⁴ ¿Pe ro to glisqui to mine run stib zho, ni tel mazdraa nac mine run to?

⁵ ¡Golguien sca glude to ncuaane nacde to! Glo goitsoxco ndzinli gac to, dzigo lozh ga zac tsienee to lo stib zho zha gacndzinli zho.

⁶ 'Ndzon nac Xtiidz Dios, gdeete tow lo zha ne rlëeniew, sac gon rrieequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rrieequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzëeni maw.

Ncuaane gnabtaa ne zгаа new
(Mr. 1:22; Lc. 6:31, 43-44, 47-49; 11:9-13; 13:24-27)

⁷ 'Ncuaane rquiin to, golnaba lo Dios, scagaa me zneedz mew. Golguib telpe racladz to, me nac men ne gacnie to gdziel tow. Golcuedzle me, scagaa me scaania me to.

⁸ Sac grese zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzle me, rcaania me zho.

⁹ 'Golwi ganle, zig nac to zeene rnab xpëed to quiet gow win, ħniacxe ziazh to co to tib quie nia win?

¹⁰ Zeene rnabgaa win mel, ħniacxe zdeed to tib meel lo win?

¹¹ Led rioxco to lëe niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel PxoZ to dzigo, men ne zob gbaa, tsoxcd me to. Ib tedsod grese zha ne gnab lo me gdeed me ncuaane rquiin zho, zdeed mew.

¹² 'Zha ne racladz ndzinli gac miech lo zho, none glo zho zaacse gac zho lo miech. Zigtaa ley ne psan Moisésa, zigtagaa mine bnee gre zha ne biadteed xtiidz Dios padzeelaw, sca rnabeya.

¹³⁻¹⁴ 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zgaa miech guielmban ndzon ne rdeed Dios. Sac gon zha ne mban zigne notaa guic zho, rriequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

¹⁵ 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho gre mëcwxiiil yeen, per zha ntseeba, masaque nac zho zig gre coyot blë.

16 Zigne runbey miech tib yag por nex ne rquia low, scaque wen wen golwi zha nac ncuaane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets.

17 Tib tib yag nex rdeedsew xnexa. Tib yag wen, nex wen rquia low; scagaa yag ncuaana, nex ncuaan rquia low.

18 Grielod yquia nex ncuaan tib lo yag ne rquia nex wen, ni grielodgaa yquia nex wen tib lo yag ncuaan.

19 Gacxe waa grë yag ne rquia nex ncuaan, paat rquiinda, lëë gdib rruga, rlozh ga rzëëg zhow.

20 Min co nagon rne naa lo to, zha ne sca guidaad, por ncuaane run zho ga gunbey to cho nac zho.

21 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdziñd zho zaatne rnabey Pxoz naa. Sac zha ne nlipaa run mine rnabey me, zha cose gdziñ ga.

22 Gal dze co, nzian zha ne grieequia gnë lo naa: "Conque rdziuunbey no luu, blactaa name bio no bionee no Xtiidz luu lo miech, nzian milagr ne bdziuun no, haxta mendox bdziuncxoon no zeene bzeet no lë luu."

23 Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaane ndzinli.

24 'Zha ne rquiaadiag mine rne naa, ni rioxco zho rban zhow zigne naca, rrieequia nac zho ga zig tib zha ndzielguic ne bzaa lidz zaatne nac tib lo quie.

25 Niicle riab guiedox per peet racd lidz zho, niicle rrie medox, nis naal ne raclo rded zaatne

zoba ga, per rbixcheda.

²⁶ Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh.

²⁷ Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

²⁸ Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me,

²⁹ sac rlu men rnabey nac me, led yed me rseed miech zig rseed grë maistr ley.

8

Biac tib mgui ne rlan lepr

(Mr. 1:40-45; Lc. 5:12-16)

¹ Laa Jesús ziad-zëëb cho gui win co, miech guizhiu ne nal zhits me,

² tibaque brieëquia tib mgui ne rlan guiedzdox ne lë lepr, wbig me pquiitsgzhìb me lo Jesús, rëb me:

—Tebaa sigueeì luu guñguiac luu naa.

³ Dzigo pxobnia Jesús guic mgui, rëb Jesús:

—Zuñguiac naa luu. ¡Niinagazh laa luu guiaañmbe!

Horcogazha laa grë guiedz co bnitlo.

⁴ Dzigo rëbchaa Jesús lo me:

—Bina ganle, choot lo gzodiidzd luu gon zha biac luu; sinque güey lo pxoz güeyсан gon ne rieguial gdeed luu zigne rnabey ley ne psan Moisés, zeena gan zho ganle laa luu biacle.

*Biac tib zha ne rquia dziin tib lo menꝓuiib
(Lc. 7:1-10)*

⁵ Loxaque bdziꝓ Jesús guiedz Capernaum, laa tib meꝓ ne rnabey lo xmenꝓuiib zha Roma bdziꝓle lo me, rnab meꝓ co gunꝓuiac Jesús tib zha ne quia xtsiꝓ me, rēb me:

⁶ —Been tib guieꝓnzaac beenꝓuiac tib zha ne rquia xtsiꝓ naa, laa zho nix lidz naa ib gacd griaꝓ zho, mban rac zho yoobdox ne rquia zho.

⁷ Dzigo rēbchaa Jesús:

—Peet nacda, na sē naa guio ne gunꝓuiac naa zho.

⁸ —Coo —rēb menꝓuiib co—, rieguaꝓd csodziꝓ naa luu sēē luu haxta lidz naa. Nanꝓaa naa zrieelo luu nugazh gnabey luu guiac zho.

⁹ Sac zig nac naa no zha ne rnabey lo naa, ni ron naa miꝓe rnabey zho; scagaa teꝓ guiep naa tib lo zhaguiib ne rnabey naa: “Güey nu”, rie zho; rnegaa naa: “Dē nu”, riaad zho; zha ne runꝓaa dziꝓin lo naaw, miꝓe rnabeytaa naa zho, runꝓ zhow. Scaque luu nagoꝓ nanꝓaa naa zrieelo sca gnabey luu guiac xmoz naa.

¹⁰ Zeene goꝓ Jesús sca rnee meꝓ co, rley me, rēb me lo grē zha ne zienaꝓ zhits me ga:

—Lo grē zha Israel, gard goꝓ gaꝓ naa tib zha ne squitaa dib zdoo rnalo Dios.

¹¹ Ni goꝓquiaadiaga gaꝓle, zdziꝓ dze grēle zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios.

¹² Laa grē zha Israel, niicle nac zho zha ne nac diidz gdziꝓ ga, leꝓ lo ncow nēz ley guiaan zho, ga tso zho goonnē zho, haxta gow lay zho lo guieꝓnēdox co.

13 Blozh ga rëbchaa me lo menguiib co:
 —Bzë nasca, gocnan ganle zigne bliladzse luu
 guiac xmoz luu, sca gaca.
 Horcogazha laa moz co biac.

Biac xniadzoop Pedr
(Mr. 1:29-34; Lc. 4:38-41)

14 Laa zeene bdzin Jesús lidz Pedr, gon me laa
 xniadzoop Pedr nix rlan xlë.

15 Dzigo bded me zaatne nix zhuz co, zigne
 bzhen me nia zhuz laa xlë co blëz. Horcogazh
 guche zhuz beenlo zhuz ncuaane dow zho.

16 Ziedzele dzew, laa ngbidz rzëëblew, zeene
 bdzin grë miech co, nzian grë zha ne nosacsi
 mendox bdzinnie zho lo me. Grëse zho beenguiac
 me, goctox me lo grë mendox ne nosacsi zho
 ga, bencxoon me ma; ni zha ne rlangaa pe stib
 guielguidz, grëse zho beenguiac me.

17 Ga brieequia mine bzeet Isá, men ne biad-
 teed xtiidz Dios lo miech padzeela, zeene rëb me:
 “Grëse xquielnë ne, grëse guielguidz ne rziaac ne,
 me biw.”

Zha ne racladz sëëb xnëz Jesús
(Mr. 4:35-41; Lc. 8:22-25; 9:57-62)

18 Zeene gon Jesús scataa ndal miech ne goclo lo
 me ga, dzigo bnabey me xpëëdscuel me gzhixcuaa
 zho, sac laa zho no tedquia stib nëz ro nisdoo co.

19 Dzigo wbig tib men ne nac maistr ley lo me,
 rëb maistr co:

—Zaatne tsietaa luu gon, sënal naa zhits luu.

20 Dzigo rëbchaa me:

—Gocnana ganle, naa ne nac naa Mgui ne pxeel
 Dios, peet rapd naa nu, mazd zig nac grë mëz, grë

mguiñ, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

²¹ Wbigaque stib zha ne rzēnal_{le} zhits me, rēb zho:

—Ye naa gon sēnal_l naa zhits luu, per bzhiguiel bneedz diidzbey cuēz naa gangazh naa tsoliu pxoz naa.

²² Pquiab me rēb me:

—Dēnal_l zhits naa. Psaan, nzian grē zha gut no, tsow tsiequeets zho samengut zho.

²³ Dzigo laa me bzēēbnie xpēēdscuel me tib len_l barcw, laa zho zie.

²⁴⁻²⁵ Laa zho zie lo nis co, tibaque zeēne psilo brieē tib medox, masaque rlis me lo nis co, laaw psilo rzēēb len_l barcw. Dzigo lēēlēd güey zho güeycuaan zho me, sac lēētaque nixguies me.

—Ligier gan_{le} —rēb zho—, blee mcaal_l lo luu. ¡Bui gan_{le} laa ne nitlo lo nis rii, csaand luu guet ne nu!

²⁶ Dzigo rēbchaa me lo zho:

—¿Pe nacne squitaa rdzieb to? ¡Gardaque dzigo lēē gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blēz me co, niicle nis cow laaw bredze.

²⁷ Zeēne gon_l zhow, bzee zdoo zho.

—Bay chozhe waa nac men_l rii —rnee zho—. ¿Zha nac ne haxta me, haxta nis ron xtiidz me?

Men_l Gadar ne nosacsi men_ldox
(Mr. 5:1-20; Lc. 8:26-39)

²⁸ Laa zho bdziñdze stib nēz ro nisdoo co, zaatne nac xtan zha Gadar, zeēne brieequia chop mgui ne nosacsi men_ldox, bdziñ lo Jesús ga. Zha ntseeba,

rdzieb miech zho, choot rdete nēz co. Leñ baa brieē grop mgui co bdziñ zho ga,

²⁹ nguiedz roptsie zho rnee zho:

—iPeet gund luu no Jesús, psaan no! Rdziuunbey no luu, Xpēēd Dios nac luu. Ne nligaa been guielnzaac csacsid luu no niinaga.

³⁰⁻³¹ Zitlaaque ga ndxie tib dzoon nguts notop lag, dzigo bnab grē mēndox co lo Jesús rēb ma:

—Telne cuee luu no nu, bzhiguiel bneedz diidz lose grē nguts qui gdziin no.

³² —Niinaga sca gołtsie —rēb me.

Zigne psaan mēndox co grop mgui co, güey ma bdziñ ma lo grē nguts co. Horco psilo grē nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grēse ma gut.

³³ Zha ne quianap grē nguts co, gzase zho bzhoon. Güey zho lad guiedz güeyzodiidz zho zha goc grē nguts co, ni bzodiidz zho zha biac grop mgui ne nosacsi mēndox ga.

³⁴ Grēse miech co, brieē zho zieso zho. Zeēne bdziñ zho gon zho laa Jesús zo ga, dzigo bnab zho lo me siguiel me gbi me xtan zho.

9

Biac tib men ne gutoo

(Mr. 2:1-12; Lc. 5:17-26)

¹ Dzigo wbiireque bzēēb zho leñ barcw, bdziñ zho guiedz Capernaum stib, sac ga nac zaatne rbēz Jesús leñ dze co.

² Zhisaque goc bdziñ me, laa zho bdziñniele tib men rzacnē lo me, dipse men co gutoo, ib gacd sē me. Lo yag zhoob me bdziñnie zho me ga.

Zeene gon Jesús dib zdoo grë zha co rnalo zho ne me gunguiac men rzacnë co, rëbchaa me lo men rzacnë co:

—iNley bloo zdoo luu xin! iLaa naa benle perdon grëse xtol luu!

³ Ga zob blalaa maistr ley, zeene gon zho sca bnee me, bza zdoo zho rëb zho: “iQuiaguitnie men qui Dios gon squi rzë xtiidz me!”

⁴ Bienga Jesús sca rza zdoo zho, dzigo rëbchaa me: —Lëda i gon squi rza zdoo to.

⁵ Nli nganda guiab ne lo miech: “Laa naa benle perdon grëse xtol luu”; per grielod lega guiab ne laa ne gunguiac zho.

⁶ Gacnan to sca ganle naa ne nac naa Mgui ne pxeel Dios, ible rap naa poder par gon naa miech perdon.

Dzigo rëbchaa me lo men rzacnë co:

—iNiinagazh guche i, bi yag ne bzhoob luu i, zeen bzë!

⁷ Zigne sca bnee me, laa mgui co bzoli, laa me zey.

⁸ Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

Bredz Jesús Matew

(Mr. 2:13-17; Lc. 5:27-32)

⁹ Blozh ga laa Jesús brieë ga. Ro nëz zieded me gon me tib men lë Matew, lëëtaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

10 Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha ne zëëb diidz nac zha ntseeb, tipse brenie Jesús zho grë xpëëdscuel me.

11 Blalaa zha farisé, gon zho sca tipse zobnie me grë zha co, bded ga, rëbchaa zho lo xpëëdscuel me:

—¿Mod scataa na rownie xmaistr to grë zha ngoopdol, grë zha beed ne nac recaudador!

12 Bin Jesús sca quianee zho, dzigo rëbchaa me lo zho:

—Nañle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan?

13 Golsoladz ganle znu rnee Dios: “Laa naa racladz gacndooladz miech, yquia zdoo zho samiech zho, racladzdaxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

¿Pe nacne rcuand xpëëdscuel Jesús?

(Mr. 2:18-22; Lc. 5:33-39)

14 Bdzinaque xpëëdscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëëdscuel luu? Ni no grë no zha farisé, zhiga zhiga laa no rcuanle.

15 Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per zdziñ dze zeene laa mgui co gbiche, ni

zeene laa dze co gdziṅ, dzigosi nagon rieguial tso zho guielnë, rieguial ycuan zho.

¹⁶ Raṅle to gaṅle, zha ne rquiaabdie tib lë lar, yquiaad zho lar cub lad lar gox, sac zha ne sca guṅ paat yquiind wquiaabdie co. Zeene laa lar cub gbe, lëëque lëëw guṅnat zaatne nriez lar gox.

¹⁷ Scaque tsod zha ne cotsow vin cub tib leṅ guid ne padzeela noquuin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, teṅ nziu cuba none leṅ guid cubaque tsotsowa.

Brieaban tib mēdwnaa yeen

(Mr. 5:21-43; Lc. 8:40-56)

¹⁸ Lëëtaaque sca quianee Jesús lo xpëēdscuel Juan Bautist, zeene bdziṅ tib mgui ne nac zha non yadoo. Zigne bdziṅ me pquitsgzhib me lo Jesús, rëb me:

—Been tib guielnzaac së luu guio ne lidz naa. Laa tib xpēdwnaa naa blozh niina, per nanpaa naa teṅne cxobnia luu guic win, zbeeban luu win.

¹⁹ Dzigo bio Jesús nëz zienal me zhits meṅ co, gza xpëēdscuel me.

²⁰ Lad grë miech ne zienal ga, lad co no tib menwnaa, gocle tsiipchop iz rlan me tib guielguidz, rzac me zigne rzac grë meṅ wnaa gzob mëë, tibaque rlan mew ib rbëzda.

Ga zie me, zeene wbig me nëz zhits Jesús, bzhen me ro lar ne mbix Jesús,

²¹ sac tibaque güeynie guic me, ziac me totsaque ygaa xab Jesús nia me.

²² Dzigo wbiire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

²³ Laa zeene bdziṅ Jesús lidz meṅ rnabey co, laa zha ne rooḷ ndxiele, noquiaa zho grē di ne rac lo ngutoo, grēraa zha ne ndxie ga, nguiedz zēēb tsi zho roon zho, tib ruid ne rac.

²⁴ Dzigo rēbchaa me lo zho:

—Goḷree nēz ley, sac goṅ gute mēēd qui, nixguiesse win.

Zha ne rlēē, zha ne rzhidzniegaa me, laa zho brieē ley.

²⁵ Dzigo laa me bzēēb leṅ yu zaatne nix mēēd co, bzheṅ me nia win. ¡Horcogazha laa win guche!

²⁶ Grēse guiedz ne ndxie dib gax ga, gocnaṅ miech scataa milagr nroob ne been me, bleeban me mēēd co.

Biac chop zha ne roḷd lo ni tib zha ngop

²⁷ Zeene laa Jesús wbi ga, nēz zie me brienaḷ chop zha ne roḷd lo zhits me, nguiedz rbedz zho rnee zho:

—¡Jesús, xingan David, pquia zdoo no!

²⁸ Bdziṅ Jesús yu ne rbēz me, laa zho wbig lo me. Dzigo rēbchaa me lo zho:

—¿Dib zdoo to dzigo lēē rliladz to zrieelo guṅguiac naa to?

—Dib zdoo now —rēb zho.

²⁹ Dzigo pquiaania me zhits bziaalo zho, ni rēb me:

—Miṅe bliladz to i nasca, laaw gac niina zigne bliladz tow.

³⁰ ¡Horcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho,

31 ni zigne brieë zho ga, laa zho bzodiidzlew. Blozh ga, grëse guiedz ne ndxie dib gax ga, gocnan miech scataa nac milagr ne run me.

32 Loxaque wbi grop zha ne biac lo ga, laa bla zho bdziñlaque, bdziñnie zho tib meñ ne nosacsi mendox, psanngop ma meñ co.

33 Dzigo beñcxoon Jesús mendox co, zeene laa ma bzhoon laa meñ co psilo bnee. Grë miech guizhiu ne ndxie ga, per nli rzee zdoo zho, rnee zho:

—iWaltaa gard dzian ne tib meñ ne squitaa gun grë milagr qui!

34 Laa grë zha farisé rnee:

—Ma ne rnabey lo mendox nacie meñ qui, gane rrieelo runcxoon me mendox.

35 Grëse guiedz ne ndxie gax ga, zigtaa guiedz nrooba, zigtagaa guiedz lasa rie Jesús rieseed me miech. Zaatne rdziñtaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

36 Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacnie zho, rac zho zig grë mëcwxiiil yeen ne guiend xbaxtor.

37-38 Tib vuelt haxta rëb me lo xpëëdscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne gollie gliiap.

10

Bzo Jesús zha ne tsienee xtiidz me

(Mr. 3:13-19; Lc. 6:12-16)

¹ Blozhse sca bnee Jesús, dzigo bredz me gza tsiipchop zha ne nac xpëèdscuel me ga, bzo me zho tsienee zho Xtiidz Dios lo miech, bdeed me poder lo zho guñcxoon zho men̄dox zaatne nosacsi ma miech, ni guñguiac zho grë meñ rzacnë.

²⁻⁴ Znu lë gza tsiipchop zha co:
 Simón (zha ne rneeque zho Pedr),
 Ndrés (bets Simón),
 Jacob ni Juan (zha co nac xingan Zebedé),
 Lip,
 Bartol,
 Mazh,
 Matew (zha ne ptop dimi ne razh lo zha Roma),
 Jacob (xingan Alfé),
 Lebeo (zha ne rneeque zho Tadé),
 Simón (zha ne no lo partid ne racladz grieë zha Roma Israel),
 ni Judas Iscariot (zha ne güeyto Jesús).

Pxeel Jesús zha ne tsienee xtiidz me

(Mr. 6:7-13; Lc. 9:1-6)

⁵ Blozhse ga, pso me diidz lo zho zha tsie zho, rëb me lo zho:

—Nan̄le to nagon̄, tsiede to zaatne no grë zha ne nacd zha Israel, niicle sëëbde to grë guiedz ne ndxie xtan zha Samar.

⁶ Zaatne no grë zha Israel, gasë gołtsie; lëë grë mëcwxiil ne nonziaab ga.

⁷ 'Gołtsie, gołtsienee lo zho gacnan̄ zho gan̄le laa dze ziaadgaxle zeene laa Dios csilo gnabey.

8 'Grëse zha ne rzacnë, golgun_guiac zho; zha ne rlan guiedz lepr, golsan_mbe zho; zaatne nix zha ne gutle, golc_ueeban zho; grë zha ne nosacsi mendox, golgun_cxoon ma. Peet gnabde to lo miech, golguien_n gan_le lega bnedz naa poder qui lo to, bzhiide tow.

9-10 'Peet güeyde to, xab tow, lab tow, min_e nacwse to, min_e quiase ni to, min_cose gol_tsienie. Güeyde to dimi, per ni tib quiet güeyde to; sac zaatne tsiegun_n to dziin rii, ib ga none gneedz zho ncuaan_e gow to.

11 'Guiedz ne gdzintaa to, golguib dien_n pa lo no tib zha ne ndzinli, dzigo lidz zha co gol_tsiebëz, haxta gza dze ne laa to gbi guiedz co.

12 Zeen_e noguib to pa cuëz to, yu ne tsie to, zaacse gol_gac, gol_quiaabdiuzh zha ne no yu co,

13 gol_nab gun_lay Dios zho. Tel_ne wen gac zho lo to, zun_lay me zho, togo gun_casdgaa zho to, dzigo toque gun_lay me.

14 Zha ne sca siguiel_d ycaania to, gol_rieegazh lidz zho; guiedz ne siguiel_d zho yquiaadiag zho min_e nonee to, gol_bigazh guiedz co; gollit grë yudie co ni to, gol_lu lo zho gan_le led xtold_rdraa to ga tel_l laa zho nitlo.

15 Gneli naa lo to gan_le zeen_e gal_l dze ne laa Dios gun_n xquiel_wxtis me, bii lëëtaa gac guiel_në ne ygaa grë miech ne bio guiedz Sodom, guiedz Gomorr, lëdle guiel_në ro ne ygaa grë miech ne sca siguiel_d ycaania to.

16 'Nsin gol_so, golguien_n gan_le rrieequia tib mëcwxiiil yeen_se nac to, ni laa naa rxel_l to zaatne no grë coyot dox. Ndooladz gol_gac, niowse gol_gac lo miech zig rac grë palom, per scagaa con cuidad gol_tsie, gol_gan_n gan_le zha rzë meel_l.

17 Nligaa nsin gol_{so}, sac gon_{ib} ziezo miech to lo wxtis, ni lëëque len_{yadoo} ga quin_{zho} to,

18 haxta ziezo zho to lo grëraa zha nroob ne rnabey. Laa zho gun_a, loxaque ne nac to zha ne no xnëz naa, ni gagaa nagon_{gdeeda} diidz gnee to xtidz naa lo grë zha co, ni lo grëragaa miech ne nacd zha Israel.

19 'Zee_{ne} sca tsiezo zho to lo grë zha rnabey co, tsode to zhgab dien_{pe} gnee to, dien_{zhagaa} gnee tow; sac zee_{ne} sca tsiegala, Dios gneedz diidz ne gnee to.

20 Led tod gnee, sinque, jzhiEspíritu Pxoz to men_{ne} zob gbaa, men_{co} gnee ga!

21 'Zlëeniedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque xpëed zho ctsidil_{zho}, tsielo zho zho ladznia zha ne gut zho.

22 Tel_{to}, guiets yag gan_{miech} to, per tel_{ne} dziits so to tel_{pe} nactaa lo guiel_{ne} ne ted to, ib zgaa to tib guiel_{mban} ndzon ne gdzi_{ndraa} dze lozh.

23 Guiedz ne no to, zee_{ne} laa miech csilo yquiaanal_{to}, gol_{riee} ga, gol_{tsie} stib guiedz. Gneli naa lo to gan_{le}, niicle stib guiedz stib guiedz tsie to, gardaque lozh tsieted to grë guiedz ne ndxie Israel zee_{ne} gal_{dze} ne laa Mgui ne pxeel_{Dios} guiaad stib.

24 'Gol_{wi} gan_{le} zha ne nac mëedscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho.

25 Tel_{zha} gun_{miech} maistr, scaque gun_{zho} mëedscuel; tel_{pe} cteed zho bizhuan dziin, min_{coque} cteed zho zha ne quia dziin. Gacxe waa peet tsienied guic to, tel_{pe} nactaa ncuaane gnee

miech to, sac gon niicxe naa name ne nac naa Dad, mendox rnee zho nac naa.

²⁶ 'Gdziebde to, zdziñ dze ne glu ganle cho zianal mine nac diidzli, chogaa zianal guielntseeb, gal dze co grësew xobnen.

²⁷ 'Grëse mine rne naa lo to zeene nese rziodidza, golneew lo miech, haxta glaa guic yu golso, nguiedz golneew.

²⁸ Gdziebde to miech, golguien ganle no tib men nroobraa, lëe men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

²⁹ 'Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per Pxoz to gon men ne zob gbaa rsaanladzd me ma, ni tib ma guete telne gdeete me diidz.

³⁰ Pelel to dzigo csaan me, haxta guits guic tow, grësew ngaba lo me.

³¹ Gdziebde to sca, golguien ganle nonraa to lo tib dzoon mguin.

³² 'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo Pxoz naa men ne zob gbaa, nacie naa zho.

³³ Sangue zha ne ctoladznie naa lo miech, scaque naa ziep naa lo me runbeyd naa zho.

³⁴ 'iGuiabde to togo laa naa zial loxaque par cuin wense miech! Lëda gon, ye zial naa zialgunctil naa zho.

³⁵ Sac zha ne sëeb xnëz naa, zlëenie xpëed zho zho, tel mëedgaaw, zlëenie pxoz zho zho; scaque

men wnaaw, zläënie xinzhizh zho zho, zha ne nacгаа nguzhizha, zläënie xniaa tsieel zho zho.

³⁶ ¡Lëëque menlidz miech gac zha ne glëë gan zho!

³⁷ 'Zha ne mazdraa rquia zdoos glëënie pxoz zho zho, glëënie xniaa zho zho, glëëniegaa xpëed zho zho, porne gun zho mine rnabey naa, peet xtsiind zha co par ygab zho xnëz naa.

³⁸ Scaque zha ne yquia zdoos cueeladz zho zho guiaadnal zho zhits naa, grieelod ygab zho lo naa.

³⁹ Sac grëse zha ne rquia zdoos guielmban ne rap zho lo guidzliu rii, ygaad zho guielmban ndzon ne gneedz Dios; sangue zha ne cueeladz xquielmban, niicle tel csacsi miech zho loxaque ne no zho xnëz naa, ib zgaa zho guielmban ndzon co.

⁴⁰ 'Niina gon ne squi tsie to, grëse zha ne zaacse ycaania to, zaacse gnee zho lo to, rrieequia naa ga sca ycaania zho; ni zha ne sca ycaania naa, rrieequia men ne pxeelle naa ga sca ycaania zho.

⁴¹ Zha ne cuëzlo tib men ne noteed xtiidz Dios lo miech, guielnzaac ne gdeed Dios lo men co, ye zho yгаа guielnzaac co. Zha ne cuëzlo tib miech ndzinli, guielnzaac ne gdeed Dios lo zha co, ye zho ygaaw.

⁴² Ni zha ne gneedz maase tib zhigaque nis yag lo cho tib zha win ne nac to ne nac to xpëedscuel naa, ib tedsod zdeed Dios guielnzaac ne tsieguial zho.

11

*Zha ne pxeel Juan Bautist
(Lc. 7:18-35)*

¹ Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieaque,

güey me grë guiedz ne ndxie gax ga, güeyseed me grë miech co.

²⁻³ Leñ dze co no Juan Bautist ladzguiib, ga no Juan bin Juan zha nactaa grë milagr ne run Jesús, dzigo pxeel Juan bla xpëëdsuel Juan güeynabdiidz zho lo me, dien pe lëële Men ne zëëble diidz cxeel Dios lo guidzliu ga nac me, te dzigora gdzin men co ye.

⁴ Dzigo rëbchaa me lo zho:

—Grë ncuaane bin to rne naa, grëгаа ncuaane gon to run naa, goltsie golzodiidza lo Juan.

⁵ Rañ to ganle grë zha ne rold lo, grë zha ne gacd së, grë zha ne rlan guiedz lepr, grë zha ne rcuaat, laa zho riac; haxta grë zha ne gutle, laa zho rrieeban. Xtiidz Diosa, laaw quiagaaz lo grëse zha ne rqiina. Grësew, golzodiidza.

⁶ Ni golguiab lo me, dichos zha ne racchopd guic, sinque tiblque rac zho riladz zho cho nac naa.

⁷⁻⁸ Zeene laa xpëëdsuel Juan zey, dzigo psilo me bzeet me Juan lo miech guizhiu ne ndxie lo me ga, rëb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rëb to rlu me zig tib goobgui ne nëzrii nëzrec rey me, te rëb to ye masaque grë lar niazh ne racw zha non nacw me? Per nanle to ganle zha ne scataa racwxab riid zho dan.

⁹ Nligaa cho dien güeynie guic to nac me, ¿te rëb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

¹⁰ Me ga raquiet lo Xtiidz Dios zaatne znu rnee:

Sxel̄ naa tib zha ne tednerga lo luu,
zha co gzhixcuaa nēz ne ted luu.

¹¹ Ne nligaa lo grēse mgui ne zieded lo guidzliu gard grieequia tib zha ne mazdraa non lo Juan Bautist; per zha ne goṅ winraa zaatne rnabey Dios, nonraa zha co lo me.

¹² 'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlēenie zhiwseed Dios, gacxe waa zha ne nlipaa rdziebd, zha cose rcaaniaw, rzēēb zho xnēz me.

¹³ Mazd glo tibaque raquiet ne laa meṅ ne cxeel̄ Dios ga guiaad, zigtaa lo leya, zigtagaa grē zha ne biadteed xtiidz Diosa, bzeet zhow. Ni niina ne laa Juan biaad, laa meṅ co blanso.

¹⁴ Juan goṅ biaad niina zig no diidz guiaad Lí; goḷgacnaṅ sca ganle cho nac me.

¹⁵ Zha ne racladz guieṅ zho zha nac grē miṅe none naa nu, jyquiaadiag zhow!

¹⁶⁻¹⁷ 'Nac grē miech rii, rieṅd zho pe racladz zho. ¿Cho ganle run̄ zig run̄ zho? Lēē zho run̄ miṅe run̄ mēēdlas ne rio wguir ro nēz, niicle rool̄ xcompañer win di nguieel̄ rieved win, niicle rool̄gaa zho di ngan, roond win.

¹⁸ Sac goṅ biaad Juan, ran̄ zho rowd me tel̄ pe ncuane row zho, ried me ncuane rie zho, dzigo laa zho rnee meṅdox nacie me.

¹⁹ Blozh ga ziaad Mgui ne pxeel̄ Dios, ran̄ zho row me, rie me, laa zho rneeque, lega rowcho me, lega riecho me, ib rieṅd me cho rtsieelsa me, haxta grē zha ngoopdol̄, haxta grē zha yozh ne rtop dimi ne razh lo zha Roma rzēnie me. Sca rnee zho,

sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

*Miech ne bzhiguield ncaania xtiidz Jesús
(Lc. 10:13-15, 21-22)*

²⁰ Blozhse ga, dzigo psilo Jesús bzeet me mine yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquielntseeb zho, rëb me:

²¹ —¡Probsaxe grë men guiedz Corazín, grë men guiedz Betsaid! Sac gon gonpaa zho grë poder ne rap Dios, per ib psaand zho xquielntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielnë, zëëb nsaan zho xquielntseeb zho, mbig zho lo Dios.

²² Gacnan zha Corazín, gacnan zha Betsaid sca ganle, gal dze ne gun Dios guielwxtis, lëëtaa caxtigw ne yгаа zha Tiro ni zha Sidón, mazdraa mine yгаа zho.

²³ Scaque zha Capernaum, masaque rzac zho niina zha nziuuraa lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho.

²⁴ ¡Gacnan zha Capernaum ganle gal dze ne gun Dios guielwxtis, lëëtaa caxtigw ne yгаа zha Sodom, mazdraa mine yгаа zho!

²⁵ Dzigo bzodiidznie Jesús Dios, rëb me:

—Dios luu ne nac luu Pxoz naa, luu rnabey gbaa luu rnabey guidzliu, rnedz naa xquizh lo luu sac grë mine noyun luu nu niina bdeete luu diidz

niacnaṅ grē zha raca, sinque laaw blu luu lo grē zha ne nac zig grē mēēdlas.

²⁶ Sca quiayunṅ luu, sac ib scale racladz luu gaca.

²⁷ Blozh ga rēb me lo grē miech ne ndxie ga:

—Grēse ncuaaṅe ranṅ to quiayunṅ naa, Dios menṅ ne nac Pxoṅ naa, me bneedz poder rii lo naa; sac ib laa me bzo naa, naa guṅa. Xpēēd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa guṅbey me, zunbey zho me.

²⁸ Grēse to ne nac to zha ne nē noded, rdib rdzag to quiaguib to dienṅ zha guiaanwen zdoo to, goltē lo naa, naa gneedz tib wdziiladz ndzon lo to.

²⁹ Nligaa golbig lo naa, goltēnaṅ zhiwseed naa, golgac tib miech tibililadz, tib miech ndooladz zigne nac naa; zeena gap to descans co.

³⁰ Nacda ncuaaṅe ngaṅ, nacda ncuaaṅe guiab to glēbde to guṅ tow.

12

Dze ne rdziiladz zha Israel lo dziin (Mr. 2:23-28; Lc. 6:1-5)

¹ Lenṅ dze coquew, tib dze lēētaque dze ne rdziiladz zha Israel lo dziina, bded Jesús zaatne zēēb zhobxtil grē xpēēdscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co.

² Goṅ bla zha farisew, dzigo rēb zho:

—ṽLēda i goṅ noyunṅ to, noguiits to ley i! Golguienṅ gaṅle dze nda nac dze rii.

³ Pquiabchaa me rēb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

⁴Rneew, bzëeb me len yadoo güey nab me guietxtil ne nac gon, downie me grë zha ne ziegza me ga, ni loxaque zha ne nacse pxoz row guietxtil co, ¿pe led bdiitsd me ley ga?

⁵Lo xley Moisés name zhobnee ganle zha haxta dze ne rdziiladz to lo dziin run grë pxoz dziin len yadoo, ni rneeda dol ga sca run zho.

⁶Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

⁷Rnee Dios lo Xtiidz me, quiambëzd me dien peraa gun miech, dien peraa cogon zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol.

⁸Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

Biac tib mgui ne mband tib nia

(Mr. 3:1-6; Lc. 6:6-11)

⁹Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co.

¹⁰Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

¹¹Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiil to tib len blë nroob, ¿led zëëb lëë rie to riebee to ma?

¹² Tel sca rquia zdoo to mëcwxiil, jgolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

¹³ Dzigo rëbchaa me lo mgui ne në nia ga:

—¡Bzigaa nia luu!

Zigne bzigaa mgui nia mgui, biacgazha, biaana zig nac stib mine ndaantaque ga.

¹⁴ Grë zha farisé co, zigne brieë zho ga laa zho psilo bnediudz dien zha gdeeda diudz gut zho Jesús.

¹⁵ Bien Jesús sca no guic zho, dzigo mazd brieë me ga. Miech guizhiu ne zienal zhits me, grëse men rzacnë ne zienal ga, beenguiac me zho;

¹⁶ per pso me diudz lo zho, choot lo gzodiidzd zhow.

¹⁷ Ga brieëquia mine pquiaa Isá, tib men ne biadteed xtiidz Dios padzeela, zeene rëb me:

¹⁸ Lëë men rii bzooblo naa gun xtsin naa, rleynie naa me, rzac zdoo naa grë ncuaane run me.

Zded naa zhiEspíritu naa gacnie me, me nac men ne cxobnen xtidz naa lo grëse miech.

¹⁹ Tilnied me miech, sedzd yan me lo zho, sod me ro nëz goptsie me.

²⁰ Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele, csaand me zdoo zho; zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnañ mine nac diidzli, ni tsienal zhow.

21 Haxta zeene gaṅ me ye grē zha ne nacdraa zha Israel,
laa zho gnalo me.

Rēb zho menḁox nacie Jesús

(Mr. 3:20-30; Lc. 6:43-45; 11:14-23; 12:10)

22 Dzigo güeynie zho tib mgui lo Jesús roḁd lo mgui ni gacdaque gnee mgui, sac nosacsi menḁox mgui. Znuse beenḁuiac me mgui, gagazh psilo goṅ mgui, psilo bnee mgui.

23 Grē miech ne ndxie lo me ga, per nli bzee zdoo zho, rnee zho:

—¡Bay pe lēē meṅ qui naye nac Meṅ ne zēēble diidz ga cxeel Dios!

24 Zeene goṅ zha farisé sca rnee grē miech co, rzachaa zdoo zho rnee zho: “Pe Dios nazho cxeel me, ma ne rnabey lo menḁox ma co nacie me, gane rrieelo runcxooṅ me menḁox.”

25 Bien Jesús sca rza guic zho, dzigo rēbchaa me lo zho:

—¡Ncuaane gacd goṅ rnee to! Teḁ tib wxtis nadien lēēque zha ne nacie zho csilo tiḁnie zho, ¿niacxe zac gnabey zho? Tib guiedza, teḁ lēēque zha guiedz co tiḁnie meṅladz zho, led znuse lozh guiedz co; tib diigaa miecha, teḁ lēēque zha tiḁnie meṅlidz zho, ¿niacxe nitlod dii co?

26 Scaque menḁox nagoṅ, teḁne lēēque lēē ma guṅcxooṅ samenḁox ma, ¡pe nale na bnitlo ma!

27 Nana ne squi rnee to Beelzebú nacie naa gane rrieelo runcxooṅ naa menḁox, ¿zha ne nacgrē to dzigo, cho nacie zho ne ye zho runcxooṅ ma? Gase naganle rlu dolḁox i quiayun to, squi rnee to.

28 Saṅgue tel̄ naa zhiEspíritu Dios nacie naa gane ruṅcxooṅ naa meṅdox, ni ga rlu gaṅle laa Dios psilo quianabeyle nu.

29 'iMasaque nac meṅdox zig tib zha ne no xfuers, zha ne gacladz cuee grē ncuaaṅe no lidz zha co, none cxidoogazh zho zho!

30 Tel̄ meṅdoxa rlēēnie ma naa, ni naṅle to gaṅle zha ne rlēē lo ne, gacnied zho ne.

31-32 'Gacnaṅ to gaṅle, grēse dol̄ ne ruṅ miech, grē tel̄ zha rguie zho, rdzibdee zho, niicle tel̄ haxta gneenē zho naa, bii zuṅ Dios zho perdon miṅ co; saṅgue zha ne gneenē zhiEspíritu me, ib guṅdraa me zho perdon.

33 'Nanle to gaṅle zig nac yag nex, miṅe nac yag, miṅ co nac nex ne rdeeda. Tel̄ yag wena nex wen rquia low, togo yag ncuangaaw, nex ncuanaaque rquia low.

34 'iScaque to nagoṅ zhin meṅdox! ¿Zha naṅ to nadien̄ gac to miech wen, tel̄ desde zdoo to ntseeb? Miech ntseeb to gane squi rzē xtiidz to, sac goṅ, i grēse diidz ne rriee ro miech, zdoo zho rzaw!

35 Gacxe waa, zha ne mbe zdoo, niapse diidz wen, diidz ndooladz nac xtiidz zho. Saṅgue zha ne ntseeb zdoo, niapse diidz ntseeb, niapse diidznē rrieeche ro zho.

36 Ni gaḷ dze ne goṅ guṅ Dios guiel̄wxtis, ib tedsod zuṅquizh me miech tib tib diidz ntseeb, tib tib diidznē ne sca rriee ro zho.

37 Sac goṅ zigne rzē xtiidz zho niina, miṅ co cueequia zho gaḷ dze co, o miṅcogaa cteedquie zho.

Racladz zha farisé gaṅ zho milagr

(Mr. 3:31-35; 8:12; Lc. 8:19-21; 11:24-26, 29-32)

³⁸ Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

³⁹ Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to?

⁴⁰ Stibaque milagr gon gan to, lëe min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len mel nroob co tson dze ni tson guieel.

⁴¹ Ni gal dze ne gon gun Dios xquielwxtis me, ib steedquie zha Nínive miech ntseeb ne nac to i; sac gon zeene güeynee Jonás lo zho, grëse zho psaan xquielntseeb zho wbig zho nëz lo Dios, laa to nëde to gon to diidz niicle ne lo to nu zo tib men ne mazdraa non lo Jonás.

⁴² Scaque rein ne bzob nëz Sabá, steedquie me to gal dze co, sac tel rein co golwi ganle pa lo guidzliu ne brie me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

⁴³ Telne csaande to xquielntseeb to i gon, low lozh to. Sac to zig bzhaac tib zha ne psacsi mendox. Zeene brie ma zdoo zho, güey ma güeyquianzë ma grë dan zit güeyguib ma dien pa cuëz ma. Gonse ma rdziel zaatne cuëz ma,

⁴⁴ rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets,

⁴⁵ nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. jDzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

⁴⁶ Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëeb zho haxta len yu, sac scataa miech guizhiu ne ndxie lo me ga.

⁴⁷ Dzigo rëb tib zho lo me:

—Laa xniaa luu gon ni zha bets luu quiambëz luu nëz ley, racladz zho gzodiidznie zho luu.

⁴⁸ Pquiab me rëb me:

—¿Xnia naa ye, bets naa ye?

⁴⁹ Blis nia me, blu me grë xpëëdscuel me, dzigo rëbchaa me:

—Zha ne gon nac zig zha rii, lëe xnia naa ga, lëe bets naa ga.

⁵⁰ jSac grëse zha ne run mine rnabey PxoZ naa men ne zob gbaa, grëse zha co nac bets naa, nac bzian naa, nac xnia naa!

13

Nac Xtiidz Dios zig zhobxtil

(Mr. 4:1-20; Lc. 8:4-15)

¹ Blozh ga brieë Jesús güey me ro nisdoo. Ga zob me,

² zeene gon me nzian miech ne nocaalsa lo me ga, nacne biep me güeysob me tib len barcw zo gax ro nis co, psilo me pseed me zho.

³⁻⁴ Ndal grë ncuane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nëz, now bliaal lad quie, now bliaal len yag guiets. Mine bliaal gax ro nëz ga, güey grè mguin znuse dow maw.

⁵ Mine bliaal zaatne nac lad quie, znuse znuse blana,

⁶ per zeene laa lo ngbidz brie, znusaque bgoola, bidzgaw; sac guien nroob low.

⁷ Mine bliaal zaatne nac len yag guiets co, zeene laa yag guiets pxii, bnitlogaw.

⁸ Sangue mine bliaal zaatne nac lo liu naal, blana, brooba ni goca; lo tib tib zhob co no zhimziona brie galptsii zhob, now brie tsongal, nogaaw brie haxta tib gayoow.

⁹ Blozh ga, rëbcha me:

—Zha ne racladz guien mine rne naa nu, yquiaa-diag zhow.

¹⁰ Zeene laa grè miech co zey, dzigo wbig xpëedscuel me bhabdiidz zho lo me dien pe nac ne sca niapse con cuent rseed me grè miech.

¹¹ Pquiab me rëb me:

—Tel to, Dioszhal rlu lo to zha rnabey me, niicle ncuaane mazdraa ngeetsa; laa grëraa miech ne gard gbig lo me, grielod guien zhow.

¹² Sac zha ne noxcole dien zha rnabey me, zdeedraa me guielbiini lo zho guien zhow, laa zha ne noxcoda, mine riense zho, stiche mew.

¹³ Sca rseed naa zho parne tsoguic zho zha rnabey Dios, per nac zho niicle nzhal lo zho rwi zho, per peet ran zho; niicle nzhal diag zho per peet rond zho; ib peet riend zho.

¹⁴ Lëe mine nac zho i bzeet Isá, zeene znu rëb me:

Nac miech qui, niicle peraa ron zho, per peet riend zho;

niicle rwiraa zho, per peet ran d zho.

¹⁵ Ne nlipaa miech nad, miech ndip zdoo nac zho, rrieequia ntse zho diag zho, ntse zho lo zho;

parne peet gond zho, peet gan d zho.

Ib riend zho zha gbig zho lo naa, ygab zho xnöz naa, parne csilaa naa zho.

¹⁶ 'Sangue to —rëb Jesús lo zho—. ¡Dichos to porne rien to pe ran to, ni rien gaa to miñe ron to!

¹⁷ Blactaa zha ne biadteed xtiidz Dios padzeela, blactaa zha ne güeyna l miñe nac diidzli, bzoobladz zho nian zho grë ncuaane ran to niina, per bgaad zho nian zhow; bzoobladz zho nquiaadiag zho grë ncuaane noquiaadiag to, per bgaad zho nion zhow.

¹⁸ 'Golquiaadiag sca gan le zha nac xcuent zha ne güey gon ga.

¹⁹ Ro nöz ne sca bliaa l zhub co, sca nac palal miech ne riepaa zha ne rienee Xtiidz Dios lo zho, per rioguid zhow, rlozh ga rdziñaque mendox, rietiche ma tel palalse miñe rien zho.

²⁰ Lad quie ne bliaa l spalal zhub co, sca nac grë zha ne rley rcaania Xtiidz Dios;

²¹ per led dib zdood zho rcaania zhow, gane zeene laa miech rsilo rlëe lo zho, laa miech rtsidil zho porne rliladz zhow, rsaanga zhow.

²² Nogaa zho nac zig nac len yag guiets co. Rquiaadiag zho Xtiidz Dios, per rsilo zho lel grë ncuaane no lo guidzliu rii mazdraa rionie guic zho, rquidie grë dimi zho. Grë ncuaan co rioxco-raa zho, laa ne tsonie Xtiidz Dios guic zho, miñ co rquiaqui ib rund zho miñe rnabey me.

²³ Laa liu naal ne bliaal miñe scataa goc ga, sca nac grë zha ne dib zdoo rquiaadiag Xtiidz Dios, rien zho zha naca, ni rban zhow zigne rnabeya. Rrieequia grë ncuane run zho, no zho nac zig mzion ne brieë galptsii zhob ga, no zho nac zig miñe brieë tsonḡala, nogaa zho nac zig miñe brieë tib gayoow ga.

*Zha nac xquieḡrnabey Dios
(Mr. 4:30-34; Lc. 13:18-21)*

²⁴ Biire pcaalsa miech lo me stib, dzigo psiloque me pseed me zho con stib cuent, rëb me:

—Ziaad gac xquieḡrnabey Dios lo guidzliu rii zig bzhaac tib meñ ne gon zhobxtil. Niapse zhob wen, zhob nal gon me,

²⁵ per no tib zha ne rlëe lo me, goḡ tib pcow liu, horne grëse miech nixguies, güey zho güeylaal zho xmidz guizh ncuuan zaatne gon me.

²⁶ 'Zeene laa zhobxtil co psilo blan mzion, hor coraa blu laa guizh ncuuan co no lada.

²⁷ Grë zha ne quia xtsiin me, zeene gon zhow güey zho rëb zho lo me: “Tebaa gañ luu ganle, dipse lad xoob luu zëeb guizh ncuuan, ¿dieen pa brieew gocbniw ga?”

²⁸ Dzigo rëb me: “Rien naa no cho tib zha ne rlëe lo naa, zha co been dziin co.”

'Gocladz zho, hor cogazh nielaadz zhow per bzhiguielḡ me,

²⁹ rëb me lo zho: “Tsielaadzde tow, sac telḡ glaadz tow niina ye zhobxtil gliadzniew.

³⁰ Goḡsaan sca zëeba ga, na zeene laa wlaap gac, hor co gnabey naa zha ne quuits zhob, ctopgazh

zhow gdziin zhow tib lad tseca; lozhraa ga quuits zho zhob, tsasa ga, glansow ro yu.”

³¹ Blozh ga bzeet me midz moxtaz, rëb me:

—Nac xquielrnabey Dios zig nac tib midz moxtaz ne ran miech dan rii. Nan to ganle midz moxtaz nac midz ne mazdraa win,

³² ni tel gacniw, rrooba ni lëew rroobraa lo grë guizh ne ran zho ro yu, raca lal tib yag nex, haxta rdzin grë mguin rzhixcuua ma zhiptsieez ma lo grë zhicwa.

³³ Rëbaque me:

—Nac xquielrnabey Dios zig nac ncobi ne rquiaa men wnaa lad ncob ne riaa guietxtil. Niipaque ncobi riots tson lmud rin, ni dib nacse ncob co rzibe.

³⁴ Grëse mine pseed Jesús grë miech co, niapse con cuent bnee mew lo zho.

³⁵ Ga briequia mine bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaane gard gacnan miech wlal ne bre guidzliu.”

Zha nac xcuent guizh ncuaan co

³⁶ Blozhse bnee Jesús lo grë miech co guey zho, yeque me laa me zey gza xpëedscuel me. Bdzin zho ro yu, ga bnaab zho lo me siguiel me gnee me lo zho dien zha nac xcuent guizh ncuaan ne bzeet me ga.

³⁷ Dzigo rëbchaa me lo zho:

—Golgona sca, znu gon nac cuent co. Rriequia gon naa ga nac men ne gon zhob co.

³⁸ Liu ne bniaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaan co nac grë zha ne no ladznia menox.

³⁹ Zha ne güeygan guizh ncuaan co, lëë mendox ga. Dze lo wlaap co, gac dze ne gun Dios xquielwxtis me, zha ne tsie wlaap ga, lëë anjl ga.

⁴⁰ Ni zigne sca cuee zho guizh ncuaan co lad zhobxtil, gzëëg zhow, scapaa nagon gal dze ne gac xquielwxtis Dios,

⁴¹ sxel naa grë xanjl naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa.

⁴² ¡Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdodox co.

⁴³ Laa grë zha ne güeynal miñe nac diidzli, zha co gdziñ zaatne rnabey PxoZ naa, masaque zig xbiini ngbidz glu zho ga. ¡Zha ne racladz guieña yquiaadiag zhow!

⁴⁴ 'Ziaad gac xquielrnabey Dios zig tib ncuaan non ne noliu tib lo xcuaa miech. Zha ne gdziel tib ncuaane sca non, ib tedsod zie zho sto zho grëse ncuaane rap zho grieë dimi si zho liu co, parne gunchen zho ncuaan non co.

⁴⁵ 'Zha ne rzëëb lo xquielrnabey Dios ziaad gac zho zig tib zha ne rzi quie perl miñe mazdraa niazh.

⁴⁶ Zeene ron zho pa no tib perl co, rto zho grëse ncuaane rap zho, rie zho rzi zhow.

⁴⁷ 'Nacaque xquielrnabey Dios, zig tib guieX nroob ne rgaa mel niina, zeene rsëëb ngooz mela lo nis grë lose mel rtopa.

⁴⁸ Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëëb zho.

49 Scapaa nagon gac miech gal dze ne gun Dios xquielwxtis me, ziaad grë xanj1 me cuee zho grë zha ntseeb lo zha ne no xnëz me,

50 tsieron zho zho lo guidox ne riegual zho. Ga tso zho goonnë zho, haxta gow lay zho lo guielnëdox co.

51 Blozhse ga, rëb me lo zho:

—¿Pe bien to na zha nac grë minë blozh bne naa lo to nu?

Grëse zho pquiab rëb zho:

—Bien now.

52 Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios minë zialnie naa niina, masaque nac zho zig tib zha gol ne quanie chop lo ncuaan non lidz zho, quanie zho grë min gol-le ni quaniequegaa zho min cub.

Güey Jesús ladz me

(Mr. 6:1-6; Lc. 4:16-30)

53 Blozhse sca bzodiidz me grë cuent co lo zho, laa me brieë ga zie me nëz ladz me.

54 Bdzin me ga güey me yadoo, psilo me pseed me grë miech co. Per nli rzee zdoo zho ron zho grë minë rnee me, r nabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

55 Tib zhinse ngurëyag name nac me. Led lëë xingan Marí i, bets me name nac Jacob, nac José, nac Simón ni Judas;

56 grë bzian mew, nu no zho grë zho. ¿Pa dzigo güey me wseed qui?

⁵⁷ Ib been_{casd} zho me, haxta rlëe zho lo me. Zeene gon _{me sca rac} zho, rëb_{cha} me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni men_{lidz} zho ni men_{ladz} zho nëd gun_{bey} zho.

⁵⁸ Beend me nzian milagr ga, sac sca ndip zdoogre miech co ib nëd zho nliladz zho cho nac me.

14

Gut Juan Bautist

(Mr. 6:14-29; Lc. 9:7-9)

¹ Len_{dze co bin rey} Herod (men _{ne rnabey} Galilé) grë ncuane _{run} Jesús, sac tel _{pa lotaaw} zëeb xtiidz me;

² dzigo rëb Herod lo grë zha ne run_{dziin} lo me:

—Rien_{naa lëe} Juan Bautist ga quiayun _{grë min} co, segur brie_{eban} me.

³ Sca rnee Herod sac nan_{wen} me zha been _{me} Juan. Me bnabey _{bгаа} Juan bzoob zho Juan caden bio Juan ladz_{guiib},

⁴ loxaque ne rnee Juan lo me nongui_{lda} ga lëe_{que} Herodí ptsie_{lnia} me, sac tsieelpaa _{bets} me Lip _{nac} Herodí.

⁵ Gocladz Herod niut me Juan, per bdzieb _{me} men_{guiedz}, sac rley_{nie} zho Juan, rien _{zho} xtiidz Dios ziadteed Juan lo miech.

⁶ Laa tib_{taa} dzew, lëe_{taque} noyac zhilni Herod dze ne bloozh _{me} stib iz, bded tib xindzoop Herodí squi ndxie _{grë} zha ne zobnie _{me} psilo ndzoop biee ndzoop. Bdziladz me gon _{me} zha biee ndzoop,

⁷ haxta brie_e ro me rëb _{me}: “Ncuane _{ga}cladz-taa luu gnab _{luu}, znedz _{naaw}.”

⁸ Per glole pquii Herodí ndzooop, nacne rëb ndzooop lo me: “Míne racladz naa, xoob guic Juan tib len̄ bandej gneedz luuw lo naa niinagazh.”

⁹⁻¹⁰ Zeene bin Herod sca rëb ndzooop, mbanse rac me; per rdeetraaw diidz niab me grieloda, sac grëse zha ne zobnie me ga, bin zho rëb me zdeed me ncuaañe gnabtaa ndzooop. Dzigo racse me pxeel me zha ne güeychug guic Juan len̄ ladzguiib.

¹¹ Zeene wbire zho, zhoobse guic Juan tib len̄ bandej bdeed zhow lo ndzooop, dzigo güey ndzooop güeydeed ndzooopa lo xniaa ndzooop.

¹² Zeene gocnan̄ xpëédscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

Bguiaan̄ Jesús gaay mil miech

(Mr. 6:30-44; Lc. 9:10-17; Jn. 6:1-14)

¹³ Zeene bin Jesús sca bzhaac Juan, dzigo brieec me ga bzëeb me barcw zie me tib zaatne guiend̄ miech. Per znuse bien̄ diidza, nzian grë guiedz co zha ne gocnaña, tib ro nis güey zho, glole zho bdziñ zaatne no gdziñ me ga.

¹⁴ Laa me noyet len̄ barcw, zeene blis lo me gon̄ me laa grë miech guizhiu co ndxiele ga; pquia zdoo me zho, been̄guiac me grë mguidz ne zienie zho.

¹⁵ Laa dze ziedzelew, wbig xpëédscuel me rëb zho lo me:

—Mazd gudz lo grë miech qui guey zho na, zeenā guiob tsie zho grë guiedz win ne ndxie gax i tsiesi zho ncuaañe gow zho; sac gon̄ laa dze bdzele.

¹⁶ Pquiab me rëb me lo zho:

—¿Pe nacne guey zho squise? To none gdeed ncuaane gow zho.

¹⁷ Rëbchaa zho:

—¿Per pe dien yguiaan no zho? Pe rnase gaay guietxtil ni chop mel ne ziaadnie no nu, lo grëtaa miech qui.

¹⁸ Dzigo bnabey me zho güeynie zho guietxtil co, güeynie zho mel co lo me,

¹⁹ ni bnabey me grë miech co bzob zho lo grë guizh nguia ne zëëb ga. Horco bzheñ me gza guietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza guietxtil co, mel co ne, zigse rdeed mew lo xpëëdscuel me scase scase bdiiz zhow lo grë miech co.

²⁰⁻²¹ Grëse zho dow zho haxta zaatne bieltaa zdoo zho. Miech tafa, zha bguise rgaa zig gaay mil, nandragaa grë men wnaa, grë mëëdla; ni zeene blozh dow zho, scase ncuaane nroob biaan, biodzë tsiipchop chicuid bio grë guietxtil co, bio grë mel co.

Rzë Jesús lo nisdoo

(Mr. 6:45-56; Jn. 6:16-21)

²² Zeene blozh ga, bnabey Jesús xpëëdscuel me bzëëb zho leñ barcw, zeena zienerga zho tedquia zho stib nëz ro nis co; laa me bii blëz ga, nozonëz me grë miech co.

²³ Blozhse bzonëz me zho, dzigo güey me tib guic gui zob gax ga, güeyzodiidnie me Dios, tipse me zo ga laa liu pcow.

²⁴ Horco laa barcw ne zie xpëëdscuel me ga no lo nis co, ib gacd csëëniob zhow, sac rriee me rtsire mew, nëzrii nëzrec raca lo nis.

25 Merle guini liuw, tibaque zeene laa me bdziñ zaatne zie zho ga, tib lo nis co ziezë me.

26 Zeene gon zho laa men co sca ziaad-zë lo nis co, bdzieb zho, broptsie zho rnee zho:

—¡Tib ndziin i gon ziaad i!

27 Dzigo bnee me lo zho rëb me:

—¡Gdziebde to, naa zial nu!

28-29 Pquiab Pedr rëb Pedr:

—Telne luu i ziaad i, bneedz diidz së naa lo nis glanso naa lo luu i.

—¡Dë sca! —rëb me.

Lëëlëd biet Pedr len barcw, laa Pedr ziezële lo nis co

30 zeene gon Pedr scataa rlis me low, bdzieb Pedr. Tibaque zeene bien Pedr laa Pedr nod-edquiele low, hor co broptsiedan Pedr, rbedz Pedr me, tsiebee me Pedr ga.

31 Dzigo wbig me bzhen me nia Pedr, bzoli me Pedr lo nis co.

—¡Aque luu gon Pedr! —rëb me—. ¿Pe nace gocchop guic luu? ¿Gard gon gliladz wen luu cho nac naa?

32 Zeene laa me biepnie Pedr len barcw, laa me co blëz.

33 Grëraa zha ne no len barcw ga, rleynie zho me, rzee zdoo zho rnee zho:

—¡Nasi nagon ndion no nli Xpëed Dios nac luu!

34 Zeene bdziñ zho stib nëz ro nis co, zaatne rnee zho Genesaret, ga biet zho barcw.

35 Grë miech co zeene gocnañ zho laa me bdziñ ga, znuse znuse pxoon zho diidz grëraa guiedz ne ndxie gax ga. Dzigo brieë grë miech co, güeynie zho grë men rzacne lo me,

³⁶ rnaḅ zho lo me siguiel me maase ni xabse me xen grē meḅ rzacnē co. Grēse zha ne bzheḅ ni xab me, biac zho.

15

Ncuaane runctal xtol miech (Mr. 7:1-23)

¹ Tib dze, bdziḅ bla zha farisé ni zla maistr ley ne ziaad nēz Jerusalén, lo Jesús; rēb zho lo me:

² —¿Pe nacne dien zienald xpēēdsuel luu miḅne blu xmēḅgol ne, pe nacne zeene laa zho row, ib rguibd zho nia zho zigne nopaa tsara?

³ Pquiab me rēb me lo zho:

—¿To waa, pe nacne quiaguiits to xley Dios? Golguien ganle laa ne guḅ to miḅne rnabey Dios zigne naca, leḅ ncuaane blu xmēḅgol to, miḅ co zienald to.

⁴ Led znu goḅ rnee lo xley Dios: “Goḅ pxoz luu, goḅ xniaa luu”, ni rneew: “Zha ne quie pxoz, quiegaa zho xniaa zho, ib none guet zho.”

⁵ Laa to goḅ rnee to: “Peet nacda guḅd zho xyudar xmēḅgol zho niicle no me liaadz, totsaque gdeed zho gon.”

⁶ Tib lad rsaḅ to xley Dios, miḅne blu xmēḅgol to miḅ co noxcoraa to.

⁷ ¡Loxaque guielwquidie qui no to! Rquiaalo to miech wen nac to, per lēēpaa miḅne run to i ga bzeet Isá zeene rēb me:

⁸ Grē miech rii, rquiaalose zho runnon zho naa, rond zho diidz guḅ zho miḅne rnabey naa.

⁹ Zhlēse nac grē ncuaane run zho, rnee zho laa zho rriadgaḅ naa;

sac niapse guicle zho riab grë wseed ne quialu zho lo miech.

¹⁰ Dzigo bnee me lo grë miech ne ndxie lo me ga, rëb me:

—Gol_quiaadiag mi_ne gni naa lo to nu, ni gol_tsoxco guie_n to zha naca.

¹¹ Gol_gacna_n gan_le, grë ncuaane rdzi_n zdo miech, led mi_ncod run_ctal xto_l zho; sinque grë ncuaan_n ntseeb ne rza guic zho, diidz ntseeb ne rrie ro zho, mi_n co run_ctal xto_l zho.

¹² Horco wbig xpëëdscuel me, rëb zho:

—¿Pe bie_n luu gan_le blëë zha farisé go_n zho sca rëb luu lo zho?

¹³ Pquiab me rëb me:

—Grëse yag ne squi been_bnid Pxoz naa me_n ne zob gbaa, ib none laaw gliaadz zolo zolow.

¹⁴ Gol_saan zho, nli zha noseed miech per nac zho zig nac zha ne ro_ld lo. Ni nan_le to gan_le, te_l tib zha ne sca ro_ldle lo ni xen_aque zho nia stib zha ne ran_d, zaatne nac tib le_n blë, ib tedsod grop xcuaa zho tsietsobe ga.

¹⁵ Bdedse ga, wbig Pedr lo me rëb Pedr:

—Bzhiguiel_l bnë lo no die_n zha nac diidz ne në luu ga, ne rnee luu led ncuaane rowd miech run_ctal xto_l zho.

¹⁶ Pquiab me rëb me:

—¿Pe niicle to riendaquew dzigo lëë?

¹⁷ ¿Pe riende to grë ncuaane row miech, led mi_ncod run_ctal xto_l zho? Sac grë ncuaane row zho rdzi_nda le_n zdoomban zho, zhaa zaatne rdzi_na; tib rietedsew xcuerp zho, rlozh ga rrieegaw.

¹⁸ Saṅgue grē diidznē ne rriee ro zho, zdoomban zho ga rzaw, ni lēē miṅ co nac miṅe ruṅctal xtol zho.

¹⁹ Zdoomban zho nac zaatne rza grē ncuaan ntseeb ne ruṅ zho, zig nac:
 zeēne rio zho grē zhgab yozh,
 zeēne rut zho samiech zho,
 zeēne rionie zho zha ne nole tsieel,
 zeēne rionie zho zha ne nacd tsieel zho,
 zeēne ruṅ zho guieḷgbaan,
 zeēne lega rnexuu zho samiech zho,
 zeēne rneenē zho samiech zho.

²⁰ Grē ncuaan ntseeb co nagon nac miṅe ruṅctal xtol miech, guṅctald zho xtol zho niicle tsard nia zho zigne nacpaa grē zhiwseed mengol.

Biac xpēēd tib wnaa zit

(Mr: 7:24-30)

²¹ Ga brieē Jesús, güey me haxta nēz Tiro ni nēz Sidón.

²² Nēz co no me güey tib wnaa ne ziaad lo xtii zha Canaán lo me, nguiedz zēēb tsi wnaa co rnab me lo Jesús siguiel Jesús tsiegunḷguiaac tib xpēdwanaa me nosacsi menḷdox.

²³ Per ib pquiabd Jesús lo xtiidz wnaa co, dzigo wbig xpēēdscuel me, rēb zho:

—Mazd bzhiguiel pquiaadiag miṅe rnee wnaa qui, bui ganle zha ncuētaa zēēb tsi me naḷ me zhits ne.

²⁴ Pquiab Jesús rēb me:

—Ziald naa par guṅ naa xyudar zha zit, sinque laa Pxoz naa pxeel naa par guṅ naa xyudar grē zha Israel ne rzac zig grē mēcwxiiil ne zonziaab lo xbaxtor.

²⁵ Scaque nonee me laa wnaa co wbig pquiits-gzhib lo me.

—Bzhiguiel —rëb me—, been tib guielnzaac been xyudar naa.

²⁶ Rëbchaa Jesús lo me:

—Nonguielda gon, cob ne quiet ne no nia mëéd gdeed new lo mëcw.

²⁷ —Nliw, scaw —pquiab wnaa co—, per niicle mëcwa name rsaanaque bizhuan ma rbig ma row ma miñe rrieengaa nia mëéd.

²⁸ Horco pquiab Jesús rëb me:

—¡Squiw nagon! ¡Rlu nli dib zdoo luu rnalo luu naa! Gacxe waa miñe rnab luu i gun naa, niinagazh laaw gac.

Horcogazh biac xpëéd wnaa co.

Nzian miech ne beenguiaac Jesús

(Mr 8:1-10)

²⁹ Nëz co wbi Jesús bdziñ me ro Nisdoo Galilé.

Ro nis co no me, miech guizhiu ne pcaalsa lo me. Tib dze gon me scataa nzian miech co, dzigo güey me güeysob me tib guic gui win zob gax ga.

³⁰ Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiaac me.

³¹ ¡Ncuaane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne

rold lo, rlozhd gzee zdoo zho grë ncuaane ran zho. Grëse miech ne ndxie ga, rzee zdoo zho, rley zho roolnie zho Dios.

³² Dzigo bredz me xpëëdsuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

³³ Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guieñd miech?

³⁴ Dzigo bnabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

³⁵⁻³⁶ Dzigo bnabey me grëse miech co bzob zho lo liu. Blozh bzhen me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungröl me guietxtil co scase scase rdeed mew lo xpëëdsuel me rguiz zhow lo grë miech co; scaque been me gza mel co.

³⁷⁻³⁸ Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nan dragaa grë men wnaa, grë mëëdla; ni zeene blozh ga bii biodzë gadz chicuid bio grë mine biaan.

³⁹ Blozhse bnee me lo grë miech co, blozhse bzonëz me zho, dzigo laa me bzëëb len barcw zie ne nëz xtan zha Magdal.

16

Gocladz zha farisé niungüet zho Jesús (Mr. 8:11-21; Lc. 12:54-56)

¹ Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuaañe nonguieldgaa niuñ me. Rquiaalo zho rnab zho lo me guñ me pe tib milagr, zeena gliladz zho nli Dios pxeel me.

²⁻³ Dzigo pquiab me rëb me lo zho:

—¡Pe nlipaa rnee to rienñe to zha nac grë ncuaañe noyac len dze rii! Zha zëëb dzigo runbey to pe rlu lo xcow. Zeene ran to rquia xcow nizhnie bdze dze, rienñe to guiet stib dze co zriee lo ngbidz. Sil ne ranгаа to quia xcow nizhnie, quia xcow nlaan zhan gbaa, rienñe to guixoo guiab dze co.

⁴ Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib miñe gac zigne bzhaac Jonás.

Blozhse sca rëb me lo zho, zoque zho ga, ziega me.

⁵ Zeene brieë zho ga, zoladzd xpëëdscuel me ney zho guietxtil ne niow zho.

⁶ Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

⁷ Zeene gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

⁸ Bien me sca nonee zho, dzigo rëb me lo zho:

—¡Gardaque lëë guien to cho nac naa! ¿Pe nacne tso to zhizhgab guietxtil?

⁹ ¡Ni lalnu lëe peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan?

¹⁰ Scaque zeene gadzaque guietxtil ni bgaaw dow tap mil miech, ¿pe niicle min co rsoladzdraa to?

¹¹ ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

¹² Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

Bnee Pedr cho nac Jesús

(Mr. 8:27-30; Lc. 9:18-21)

¹³ Bdzin Jesús nëz xtan zha Cesarea de Filipino grë xpëedscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

¹⁴ Pquiab zho rëb zho:

—No zho rnee Juan Bautista, no zho rnee Lív, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig bиаad zha ne bиаad padzeela.

¹⁵ Dzigo rëb me lo zho:

—¿To waa? ¿Cho rzac to nac naa?

¹⁶ Pquiab Pedr, rëb Pedr:

—¡Luu nac Men ne zëëble diidz ga cxeel Dios! ¡Xpëed Dios nac luu!

¹⁷ Dzigo rëbcha me:

—Dichos luu Simón (xingan Jonás) brieed diidz qui ro luu, sac gon Pxoza naa men ne no gbaa, men co bneedz guielbiini qui lo luu, nacda ncuaane cho miech nëw lo luu.

18 Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda.

19 Laa naa rzo luu, luu gnee Xtidz naa lo miech zeena gacnan zho zha grieelo yгаа zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

20 Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

*Bzeet Jesús zha gun miech me
(Mr. 8:31-9:1; Lc. 9:22-27)*

21 Len dze co psilo Jesús bzeet me lo xpëëdsuel me zha csaci miech me. Rëb me nroob ncuaane cteed zho me, zeene laa me tsie Jerusalén; grë zha non lo menguiedz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

22 Gon Pedr zha rnee me, dzigo bredzaque Pedr me blisqui Pedr lo me dien pe nacte rnee me laa me guet.

23 Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gunüet luu naa! Zienied guic luu mine rnabey Dios, sinque mine rleynie miech, min co zienie guic luu.

24 Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csaci miech zho. Nodne yquia zdoo zho xquielmban zho,

²⁵ sac zha ne yquia zdoo xquie_lmban, le_l znu nitlo zho; sa_ngue zha ne sca cueeladz xquie_lmban porne no zho xnëz naa, ib zgaa zho tib guie_lmban ndzon ne gdzi_nd dze lozh.

²⁶ Zha ne zienie guic loxaque gapche_n, ¿pa dien yquiina lo zho, tel_l lëew yquiaaqui guey zho gabil? ¿Niace zrieelo gdziib zho dimi, laa zho le_n gabil?

²⁷ Naa ne nac naa Mgui ne pxeel_l Dios, zdzi_n dze ne gbiire gua_l naa stib, gua_lnie naa grë xanj_l naa, glu naa gan_{le} pa lotaa me_n nroob nac Pxoz naa; dze co gded naa mi_ne tsiegua_l tib tib miech, tel_l zha wban zho.

²⁸ Ib tedsod lo grë zha ne ndxie nu niina, bii no zha ne ga_n gan_{le}, zeene laa naa csilo gnabey lo guidzliu rii.

17

Bdzëëlo Jesús

(Mr. 9:2-13; Lc. 9:28-36)

¹ Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

² Guic gui co no zho, zeene go_n zho laa me bdzëëlo. Masaque biinidoo rrie lo me, pale lo ngbidz; xab mew, per nli rquiabniw, masaque biini ne rrona.

³ Tibaque zeene go_n zho laa Moisés ni Lí me_n ne biadteed xtiidz Dios padzeela, nozodiidznie me.

⁴ Rdzieb zho, lo dzeb co brie ro Pedr rëb Pedr:
—Maestro, ¿tebaa zha grieelo guiaan ne nu! Tel_{ne} racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

⁵ Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëe xpëed naa i gon, rleynie naa me, rzac zdoonaa mine quiayun me. Mine rnee me, golgona.

⁶ Mazdraa bdzieb zho bin zho sca rnee men co, lëëled pquiitsgzhib zho haxta bdiin lo zho lo liu.

⁷ Dzigo wbig Jesús, pcaannia me zho, rëb me:

—Golsoli, gdziebde to.

⁸ Zeene blis lo zho bui zho, mese zo ga, gonndraa zho schop men co.

⁹ Blozhse ga, laa zho wbi ga. Cho gui co ziadzëebnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

¹⁰ Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëeble diidz ga cxeel Dios?

¹¹ Rëbchaa me:

—Nliw, ible nacle diidz ne glo Lí guidseed miech gon zho xtiidz Dios.

¹² Ni gacnan to ganle laa me biaadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

¹³ Zeene blozh sca rëb me, dzigo bien zho Juan Bautist ga rzeet me.

*Biac tib mëed ne nosacsi men_udox
(Mr. 9:14-29; Lc. 9:37-43)*

¹⁴ Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieet tib

mgui, wbig me lo Jesús, pquuitsgzhìb me lo Jesús, rëb me:

¹⁵ —Laa naa rnab lo luu, bzhiguiel beenguìac xpëed naa, nrooble nosacsi guidz gutye win. Blac-taa ziyobe win lo gui, ziyobe win lo nis ne.

¹⁶ Blansonie naa win lo xpëedscuel luu nu, per rrieeìod zho guṅguìac zho win.

¹⁷ Dzigo rëbchaa Jesús lo xpëedscuel me:

—¡Pe na squìtaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¡Ncuaane cxcwdraa naa lo to squì nac to! ¡Goìtënie mëed qui nu!

¹⁸ Dzigo goctox Jesús lo mendox ne nosacsi mëed co, beṅcxooṅ me ma, hor cogazh laa mëed co biac.

¹⁹ Haxta wbiraa zho ga, wbig zho lo me bnabdi-idz zho dien pe nacne brieelod zho niuṅcxooṅ zho mendox ne nosacsi mëed co.

²⁰⁻²¹ Dzigo rëbchaa me:

—Brieelode to niuṅcxooṅ to ma, sacne rnalode to Dios. Teì niaca miṅe rnalole to Dios siquier palal yeen, gzoob ne siquier lal tib midz moxtaz, niicxe ncuaane mazdraa ngaṅ gnab to lo me, zuṅ mew; tsod ncuaane grieelod guṅ to.

Bzeet Jesús laa miech csacsi me

(Mr. 9:30-32; Lc. 9:43-45)

²² Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa,

²³ haxta zut zho naa; per zeene gac tsonṅ ngbidz gut naa, zriebaan naa.

Zeene bin zho sca rnee me, bio zho guielṅë, mbanse rac zho.

²⁴ Bdzin me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bñabdiidz zho dien pe rguizh me dimi co. Pquiab Pedr rëb Pedr lo zho:

²⁵ —Rguizh mew, ¿pe nacne quizhd mew?

Zeene bdzin zho len yu ne rbëz me, gardle guiab Pedra lo me, glole me bñabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

²⁶ Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho,

²⁷ per par guiabd zho rdziond ne diidz, güey güeyron xanzuel luu lo nis. Mel ne gloopaa yгаа low, bzhen ma pxal ro ma, ga gdziel luu dimi; dimi co güeynie bdiizh minë no dizh ne grop ne.

18

¿Cho nonraa?

(Mr. 9:33-37, 42-48; Lc. 9:46-48; 15:3-7; 17:1-3)

¹ Len dze co bñabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

² Dzigo bredz me tib mëëdbgwi win, bzo me win glowtaa lo zho,

³ rëb me:

—Gneli naa lo to ganle, telne csaande to xquielntseeb to, telne gacnguudzladzde to, gac to zig mëedwin rii, per ni xnëz Dios grieelod sëeb to.

⁴ Zha ne racladz gac zho zha non, none gac zho tib miech ndooladz, none gac zho zig tib mēēdlas.

⁵ Miech ne gacnie zha ne sca nac, zha ne rleynie naa, rrieequia naale ga racnie zho.

⁶ 'Per miech ne yquuil zho gunc̄tal zho xtol̄ zho, ꝑprobsaxe zha co! Mazd zhi guieḷnēw lo zho ygadoo tib quie molin zhobxtil yaṅ zho tsieron̄ zho zho nis̄doo.

⁷ ꝑNac lo guidzliu rii, run̄falte guieḷntseeb low! Run̄falte ncuaaṅe gunc̄tal xtol̄ miech, ꝑper probsaxe zha ne yquuil zha ne nole xnēz naa, gunc̄tal zho xtol̄ zho!

⁸ 'Gol̄guieṅ tel̄ne tib nia to, tib nigaa to rquiaqui run̄ctal to xtol̄ to, goltichegazha. Peet nacda maase tibaque ni to, tibaque nia to zob totsaque ygaa to guieḷmban ndzon ne gdziṅd dze lozh, lēdle zob gropa ni laa to guey gabil̄, lo beldox ne gdziṅd dze guiuu.

⁹ Scaque bziaalo to, miṅe rquiaqui run̄ctal to xtol̄ to, goltichegazha, peet nacd maase tibaque lo to zob totsaque ygaa to guieḷmban ndzon ne gdziṅd dze lozh, lēdle zob gropa ni laa to guey lo beldox ne nac gabil̄.

¹⁰ 'Ib gunde to csaṅwin to grēraa zha ne no xnēz naa, zha ne nac zha mban, sac goṅ non zho lo Dios, anjl̄ ne quianap zho, tibaque zo me lo Pxoꝝ naa men̄ ne zob gb̄aa.

¹¹ 'Nziuu miech lo Dios, tel̄ naa ne nac naa Mgui ne pxeel̄ me, ib laa naa zial̄ zial̄silaa naa grē zha ne zonziaab lo me.

¹² 'Rzac Dios miech zig tib men̄ ne rquianē zdoꝝ xpēcwxiiḷ. Tel̄ne quianie zho tib gayoo ma, ni gzi-aab tib ma, led zēēb lēē rsaṅ zho stapgal̄ tsiimtap

ma ne zo lo zho, rbire zho rieguib zho ma ne bziaab ga.

¹³ Zeene rdziel ma lo zho, rlozhd gleynie zho ma, lëe ma rac guielbley que grëraa xcompañer ma.

¹⁴ Scadaa nagon rzac Pxo^z naa miech, grë zha ne nole xnëz me, ib racladzd me gziaab zho.

¹⁵ 'Golguien sca, tib tib to zeene cho tib zha ne nacgrë to gun pe tib falt lo to, goltsie goltsienee lo zho; gropse to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to tib.

¹⁶ Laa telne nëd zho, dzigo golguib tib zha ne së, chopgaa zha ne së gan ganle zha rac zho.

¹⁷ Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech grë zha ne zienal guielntseeb.

¹⁸ 'Gneli naa lo to ganle, grëse zha ne gon xtiidz to zeene rnee to lo zho gac-wen zho, scagaa Dios scaania me zho; per zha ne gonda, ycaaniad me zho.

¹⁹ 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuaane gnabtaa zho lo Pxo^z naa men ne zob gbaa, zdeed mew.

²⁰ Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

²¹ Dzigo wbig Pedr rëb Pedr lo me:

—Zha ne sca dzigo gun falt lo naa, ¿blataa vult no gun naa zho perdon? ¿Gadztaaw lëe?

²² Pquiab me rëb me:

—Lēda gon Pedr, led loxaque gadzdse vuelta. Tel blataa vuelto gon zho falt lo luu, none gon luu zho perdon.

Zha ne beend perdon

²³ 'Grē zha ne no xnēz Dios, ib none gon zho perdon samiech zho.

'Tib rey name, tib dzew bredz me grē zha ne rquia dziin lo me, par dien zha quiayun zho dziin.

²⁴ Loxaque psilo me, zeeṅe laa xcuent tib zha co blozh brieē, nroob brieēquia zho lo me;

²⁵ par quizh zhow, peet nzheṅd zho. Dzigo bnabey me to zho grop tsieel zho, xpēēd zho ne, ni grēse ncuane rap zho, parne grieelo gazh xquielqui zho.

²⁶ Zeēne gon zho sca rēb me, pquitsgzhīb zho lo me, rēb zho: “jBeen guielnzaac, gop tib paciens, na dien zha gon naa quizh naa xquielqui naa lo luu!”

²⁷ Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

²⁸ 'Loxaque brieē zho ga, bdzieel zho tib zha ne nzēēb palal yeēn dimi lo zho, tib zha ne rquiaque xtsiin rey cow. Zigne gon zho zha co, zolinēz wbig zho bdie zho yaṅ zho, rnab zho gagazh quizh zho xtimi zho.

²⁹ Dzigo pquitsgzhīb zha co lo zho, rnab zho siguel zho gap zho paciens, dien zha gaclo dimi co quizh zhow.

³⁰ Pe nquiaadiag zho ga, bnab zho bio zha co ladzguib, haxta bdiizh zho dimi ne zēēb zho ga.

³¹ Grēraa zha ne rquia dziin lo rey co, zeēn gocnaṅ zhow, bdeednē zho, güey zho güeyzodiidz zhow lo me.

³² Zeene bin mew, bnabey me gocredz zho, goc-tox me lo zho rëb me: “iPe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zëëb luu ga.

³³ iPe nagne pquiad zdoo luu zha co, zigne pquia zdoo naa luu?”

³⁴ Blëë me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

³⁵ Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

19

Zha ne rsëbtsieel (Mr. 10:1-12; Lc. 16:18)

¹ Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz.

² Miech guizhiu ne rriee grë guiedz co, rdziñ lo me; grë meñ rzacnë ne rdziñnie zho, beenguiac me zho.

³ Ga no me, bdziñ bla zha farisé gocladz zho niungüet zho me, par dieñ pe nxiñd me tib diidz; bnabdiidz zho lo me rëb zho:

—Pe gnë luu dieñ, ipe wena csëbtsieel zha bgui ne gacladztaa csëbtsieel?

⁴ Pquiab me rëb me:

—iMod rande to zha zhobnee lo Xtiidz Dios? Lo co zhobnee ganle zeene psan me miech, tib nëz zho psan me, tib mgui ni tib wnaa.

⁵ Ni rneew, ib none greezhaa mgui lo pxoz zho, lo xniaa zho par gbannie zho wnaa ne nac tsiel zho, gac zho tibaque miech grop zho.

⁶ Nligaa nacdraa zho chop miech, sinque laa zho rac tibaque. Dios nac men ne psan ycatsiel miech, cho dzigo nac miech par quiits zho mine rnabey me.

⁷ Dzigo rëb zho lo me:

—¿Pex nac dzigo waa bdeed Moisés diidz csëbtsiel mgui ne racladz csëbtsiel? Rëb Moisés, zac csëbtsiel zho, totsaque yquia tib guits gdeed zho lo wnaa zaatne raquiet laa zho psaan wnaa.

⁸ Pquiabchaa me rëb me:

—Ne squitaaxe waa miech nad, miech ndip zdooc goc xmengol to, gane bdeed Moisés diidz csëbtsiel zho; sangue Dios psand me diidz csëbtsiel miech.

⁹ Gacnan to ganle, zha ne csëeb wnaa ne nac tsiel zho, ni tel peet guelyozh beend wnaa co, dol ga gun zho csëeb zho tsiel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsiel wnaa co.

¹⁰ Dzigo rëbchaa xpëedscuel me:

—Tel scataa nac xcuent guieltsiel, mazd lëequew dzigo ctsielniad ne.

¹¹ Pquiab me rëb me:

—Nligaa no mgui ne rtsielniad, per zhis zho, ni no pe nacne sca riaan zho.

¹² No zho desde rac zho mëed, nacd zho zha ne grieelo tsonie wnaa; no zho ib miech sca rсан zho. Nogaa zha ne ib zha rbeeladz zho ctsielniad zho, parne grieelo tsoxcoraa zho gun zho xtsiin

Dios. Zha ne sca rquiabladz ctsieelniad, maase ctsieelniad zho.

Beenlay Jesús mēēdlas

(Mr. 10:13-16; Lc. 18:15-17)

¹³ Ga no Jesús, ndal zha ne bdziñ bdziñnie zho xpēēdlas zho lo me, parne cxobnia me guic win guñlay me win. Grē zha ne nac xpēēdsuel me, leñ psilo zho rtsidil zho pe nacne nodziñnie zho grē mēēdlas co lo me.

¹⁴ Zeene gon me sca quiayun zho, rēbcha me lo zho:

—Ctsirede to grē mēēdlas yeen qui, gołsaan guiaad win lo naa. Sac gon grē mēēdlas yeen, ni zha ne nac zig nac win, zha co nac zha ne sēēb ygab lo Dios.

¹⁵ Dzigo psilo me pxobnia me guic grē mēēdlas yeen co, beenlay me win. Blozhse ga, laa me brieega.

Bzodiidznie tib zha ricw Jesús

(Mr. 10:17-31; Lc. 18:18-30)

¹⁶ Laa me zieriee ga, zeene bdziñ tib mgui nguieg, tib zha ricwa, rēb zho lo me:

—Nañ naa luu nac tib men ne noseed miech, ni tib men wen nac luu. Bñē diēñ, ¿pe nac miñe guñ naa parne grieelo ygaa naa guielmban ndzon ne gdziñd dze lozh?

¹⁷ Pquiab Jesús rēb me:

—Rnee luu lēē tib men wen nac naa. ¡Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu miñe rnabey Dios.

¹⁸ Pquiab zho rēb zho lo me:

—¿Pa miñ waa?

Rëbcha me:
 —Miñe rnee:
 Gute luu samiech luu,
 telne nole tsiel luu, tsonied luu zha ne led tsiel
 luu,
 cuand luu samiech luu,
 yquiadiidzguizhd luu samiech luu,
¹⁹ gon pxoz luu, gon xniaa luu, cued luu xquielto
 me.

Bleyne samiech luu, zigne rleyne luu luu.

²⁰ Dzigo rëbcha zho:

—Ni tib miñe rnee luu i gard quits naa, grësew
 zana naaw zigne naca. Racladz naa gacna naa,
 dien peraa no gun naa.

²¹ Horco rëb me lo zho:

—Tel racladz luu gac luu tib zha ne gban grëse
 miñe rnabey Dios, güey sca güeyto grëse ncuaane
 rap luu, dzigo güeytiiz dimi co lo grë zha ne guiend
 pe yquiin. Lozh ga, dë dëna zhits naa. Miñ co
 nagon gun luu, dzigo zgaa luu guielmban ndzon co;
 ni scagaa nroob guielnzaac ne yгаа luu nëz lo Dios.

²² Zeene bin zho sca rëb me, mbanse rac zho laa
 zho zey, sac nroob ncuaane quianie zho.

²³ Dzigo rëbcha Jesús lo xpëedscuel me:

—Gneli naa lo to ganle, grë zha ne squi rapchen
 rzacxuu zho par sëeb zho xnëz Dios gnabey me
 zho.

²⁴ ¡Ne nligaa ngañ rzac zhow! Mazd ngandse
 rded tib camell guieer guzh lëdle sëeb tib zha ne
 squi rapchen xnëz Dios.

²⁵ Zeene bin zho sca rëb me, rzee zdoo zho, rnee
 zho:

—Bay, ¿chösezhe dzigo waa nac zha ne zrieelo
 sëeb xnëz Dios?

²⁶ Dze bui me lo zho, dzigo rëbchaa me:

—Nligaa par miech zootle tsod zha ne grieelo sëëb xnëz me; sangue me nañ me no zho. Sac tel me, tsod ncuaane grieelod gun me.

²⁷ Horco pquiab Pedr rëb Pedr lo me:

—No dzigo waa, ¿pe nac mine ygaa no? Nanle luu ganle, tel no grëse ncuaane rdziaap no, laa no psana, ziaadnal no zhits luu.

²⁸ Pquiab me rëb me:

—Golgona ganle, dze ne gacncub grëse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel.

²⁹ Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban riique laa zho gana stib tib gayoogaw tib tiba; ni ib tedsod zgaa zho tib guielmban ndzon ne gdziindraa dze lozh.

³⁰ 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

20

Lalga nac grë zha ne no xnëz Dios

¹ 'Grë zha ne no xnëz Dios, zac zho lo me zig bzhaac grë zha ne güey xtsiin tib men co.

'Tib men co name nroob dziin quianie me, tib dzew zigne biini liu brie me güeyguib me zha ne tsielaap xuv me.

2 Bdziel me palal zho, biaan zho diidz palal quizh me zho dze, laa zho bzëëb lo dziin.

3 Glaale ngbidza brieë me güeyted me len guiedz, lëëtse güeytsib me lo bla zha ne zob ga racladz dziin.

4 Dzigo bree me zho, rëb me: “Goltsie xtsin naa, na quizh naa to minë non xtse to.”

5 'Rwe ngbidza, biire me güey me güeyguib me spalal zho. Maase las treza güeyaque me stib.

6 'Zhile sëëb ngbidza, biire me güey me len guiedz. Ga bdiieel me zla zho, gon me scase zob zho ga. Dzigo rëbchaa me lo zho: “¿Pe nacne squise noded dze to?”

7 Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

8 'Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëëb lo dziin, zha co glo bdiizh, lozhraa ga quizh luu zha ne glo bzëëb.”

9 Dzigo bded zha ne bdzele dze bzëëb lo dziin ga, tib tib zho pcaase zho minë non zho tib dze.

10 Grë zha ne glo bzëëb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

11 'Zeene gon zho lalga pcaa zho grë zho, blëë zho, güey zho güeylisqui zhow lo men ne nacchen dziin ga, rëb zho:

12 “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu,

¿zha nac dzigo lalga quizh luu no grë no zha qui, ni niipyeenaque been zho dziin?”

¹³ Pquiab me rëb me: “Bets, nosacsid naa to, biaanle ne diidz name palal quizh naa xtse to.

¹⁴ Nana sca golgüey xtimi to i, zeena golsë. Ib zdoo naa rala lalga quizh naa to grëse to.

¹⁵ ;Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

¹⁶ ‘Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

Bzeet Jesús tib laa miech csacsi me

(Mr. 10:32-45; Lc. 18:31-34)

¹⁷ Nëz no Jesús zie me nëz Jerusalén, tibaque bredz me gza tsiipchop xpëëdsuel me,

¹⁸ bzeet me lo zho zha gun miech me zeene laa zho gdziñ Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa.

¹⁹ Zha co naa ladznia zha zit, parne gunnguzee zha co naa, parne quiñ zho naa, ni haxta squiaa zho naa lo cruz. Per zeene gac tson ngbidza, zriebaan naa.

²⁰ Tibaque zeene wbig tsieel Zebedé wbignie me grop xingan me Jacob ni Juan, pquiitsgzhib me lo Jesús rnab me gun Jesús tib favor ne racladz me.

²¹ Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdziñ dze ne laa luu zob zobnabey luu; tib zho nëz derech, tib zho nëz revés.

22 Pquiab Jesús rëb me lo wnaa co:

—Ni luu gon riend pe r nab luu! ¿Niacxe zleb zho gan zho gre guienë ne gan naa, tedgaa zho gre mine teed naa?

Pquiab zho rëb zho:

—Zlëëb no.

23 Rëbchaa me lo zho:

—Nli nenda zan to gre guienë ne gan naa, ni zdedgaa to mine teed naa; per ne gnedz naa diidz sob to cue naa nëz derech, nëz revésgaa, led naad raguial min co; sac laa lugar co biaanle par zha ne tsieguiala, ni Pxoza naa men ne zob gbaa men cose nan dien chow.

24 Grëraa xpëëdscuel me, zeene bin zho pe nac mine nab Jacob grop Juan, blëë zho lo zho.

25 Dzigo bredz Jesús zho gre zho, rëb me lo zho:

—Ran to ganle zha run gre zha ne nabey gre guiedz ne ndxie lo guidzliu, ni gre zha ne nac zha non, masaque nabey zho samiech zho zigne racladzta zho.

26 Saingue to gon gunscade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to.

27 Scaquegaa zha ne racladz gnabey zho lo to, none glo cseed zho gun zho mine gnabey to zho.

28 Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

*Biac chop zha ne rold lo
(Mr. 10:46-52; Lc. 18:35-43)*

²⁹ Miech guizhiu naḷ zhits Jesús, laa me zieriee guiedz Jericó.

³⁰ Ro nēz co zob chop zha ne roḷd lo, zeene bin zho laa me ziaad ga, psilo zho nguiedz rbedz zho rnee zho:

—¡Jesús, meḅ xtii rey David, pquia zdoo no!

³¹ Blalaa zha ne zie ga, psilo zho ndox zho lo grop zha co parne guioog ro zho, per leḷ hor cole nguiedzraa rbedz zho me.

³² Nacne zeene bdziḅ me zaatne zob zho, blēz me, bnabdiidz me lo zho rēb me:

—¿Pe nadien guḅ to naa?

³³ Pquiab zho rēb zho:

—¡Racladz no guiac lo no!

³⁴ Pquia zdoo me zho goḅ me sca rac zho, dzigo pquiaania me zhits guidlo zho. Horcogazh laa lo zho biac, laa zho zienaḷ zhits me.

21

Bdziḅ Jesús Jerusalén

(Mr. 11:1-11; Lc. 19:28-40; Jn. 12:12-19)

¹ Sca no Jesús nēz grē xpēēdsuel me, laa me bdziḅ guiedz Betfagé. Gaxle ga riaan Jerusalén, nēz danse squi riaan Gui Oliv. Dzigo pxeel me chop xpēēdsuel me, rēb me lo zho:

² —Goḷtsie guiedz win ne ndxie danse lo ne i. Ga gdziḅ to zaatne quadoo tib burr gus grop xpēēd, dzigo goḷxadz ma goḷtēnie ma nu.

³ Teḷ cho gnabdiidz pe nacne noxadz to ma, goḷguiab lo zho: Meḅ ne rnabey ne, meḅ co rquiin ma, na zigne lozh xtsiin ma guiaadsaḅ no ma.

⁴ Ga brieequia miḅe bnee tib meḅ ne biadteed xtiidz Dios lo miech padzeela, zeene rēb me:

⁵ Golguiab lo meṇ Jerusalén:

“Golwi ganle, laa meṇ ne nac zhirey to ziaad i.
Tib meṇ ligase rlu me, zob me lad tib burr win,
tib ladse ma ne rey yo zob me.”

⁶ Laa zho zie, zigne bnabeysel me zho ga, scase been zho.

⁷ Zeene wbire zho, laa zho bdziṇnie burr co grop xpëed ma. Pxob zho lar ne rbix zho lad xpëed ma, laa me bzob ma.

⁸ Zigse zie me, no grë miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grë yag nguia, rdziṇ zhow ro nêz rded me.

⁹ Grëse zho, zigtaa zha ne nera, zigtaa zha ne nalā, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleynie ne me! ¡Zha ndzontaa Dios, pxeel me meṇ nroob qui lo ne!

¹⁰ Zeene bdziṇ me Jerusalén, rlozhd gzee zdoo grë miech ne ndxie ga, rnabdiidzlsa zho rnee zho:

—¡Bay cho nac meṇ qui?

¹¹ Rquiab grë zha ne nal zhits me ga, rnee zho:

—¡Lëë Jesús i! ¡Lëë meṇ Galilé qui, noteed xtiidz Dios lo miech!

Blee Jesús miech leṇ yadoo

(Mr. 11:15-19; Lc. 19:45-48; Jn. 2:13-22)

¹² Biini liu co, zeene bdziṇ Jesús Jerusalén stib, güey me yadoo nroob ne zob lad guiedz co. Bdziṇ me goṇ me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsëe dimi, ptiixche me xmezha zha ne no wto palom; blee me zho ga grëse zho,

13 rëb me lo zho:

—Led znu gon zhubnee lo Xtiidz Dios: “Zaatne nac lidz naa nu, nu none guiaad grëse miech sodidznie zho naa.” Laa to gon, quiayun to lugar rii zig tib zhibliee ngbaan.

14 Ga no me bdziñ bla zha ne rold lo, zla zha ne nē ni, wbig zho lo me. Gzase zho beenguiac me.

15 Nzian mēēdlas yeen ne ndxie len yadoo ga, psilo win nguiedz rnee win: “iZha ndzontaa xingan rey David!”

Grë zha ne nac pxoz ne rnabey, ni grë maistr ley, zeene gon zho milagr ne been me ga, ni gon zho zha rnee grë mēēdlas co, rlēē zho,

16 rëb zho lo me:

—iPe ib rond luu ganle pe nonee grë mēēdlas qui?

Pquiab me rëb me:

—Ron naaw. iTo waa, pe rande to ganle zha zhubnee lo Xtiidz Dios, zaatne raquiet mine noyac nu? Led rneew lēē:

Haxta grë mēēdlas ne bii radz, ye win rley win roolnie win me.

17 Blozhse sca rëb me, zoque zho ga, laa me bio nēz zie me nēz Betain. Ga blēz me wdze co.

Wbidz tib yag guigw

(Mr. 11:12-14, 20-33; Lc. 20:1-8)

18 Sil co zeene no me nēz gdziñ me Jerusalén, pcaabedz me.

19 Gon me zob tib yag guigw gax ro nēz, dzigo güey me güeyso me low dien pe ndziid tib nex low niow me. Bdziñ me gon me loxaque zhiblagsew zēēb, nace rëb me low:

—¡Lëë blozh xtse luu nu gon! ¡Gdzindraa dze ne yquia nex lo luu!

²⁰ Biini liu, zeene laa zho zie Jerusalén stib, gon xpëedscuel me, laa yag guigw co bidzle. Bzee zdo zho, bñabdiidz zho lo me rëb zho:

—¿Bui ganle, bay zha nacne squi znuse wbidz yag guigw qui?

²¹ Pquiab me rëb me:

—Gneli naa lo to ganle, telne dib zdo to rnalo to Dios, niicle ncuaane mazdraa ngan gnab to lo me, zun mew. Lëëraasi none dib zdo to gliladz to zaca, ni palal gacchopd guic to.

²² Grëse ncuaane gnab to zeene rzodiidznie to me, zneedz mew, totsaque dib zdo to gliladz to laa to ycaaniaw.

²³ Bdzin me Jerusalén, wbiire güey me len yadoo. Ga noseed me miech, zeene bdzin bla zha ne nac pxoz ne rnabey ni zla zha ne nac men non lo menquiedz, bñabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

²⁴ Pquiab me rëb me lo zho:

—Ye naa laa naa gun tib wñabdiidz lo to. Telne stsire to low, dzigo gni naa lo to ganle cho rnabey naa ne laa naa noyun gre ncuaane noyun naa.

²⁵ Golinë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miech-sew ye?

Psilo zho rñabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?”

²⁶ Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan menquiedz nli Dios pxeel Juan biadteed Juan xtiidz me lo miech.

²⁷ Dzigo mazd mine been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

Zha nac zha ne rond diidz

²⁸ 'Golquiaadiaga ganle. Tib mgui, quianie me chop mëedbgui. Tib dzew, bredz me tib zho rëb me lo zho: “Xin, none gon tsie luu nadze, tsietop luu uv xcuua ne.”

²⁹ Pquiab zho rëb zho: “iGad naa!” Wdzeelaaw, bien zho nonguielda ga sca gun zho, dzigo bio zho nëz güey zho.

³⁰ Laa stib zho, zeeñe bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

³¹ 'Golnë dien, lo grop mëed co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, mincodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëeb xnëz Dios, lëdle to.

³² Biaadpaa Juan Bautist name biadseed me miech csaan zho xquielntseeb zho, gban zho zigne

racladz Dios, ni pe liaadz to nion to miñe rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquiełntseeb zho. Laa to, niicle ran to nosaan grë zha co xquiełntseeb zho, per ib rsaande to miñe nac to.

*Xcuent zha ne pquianap liu
(Mr. 12:1-12; Lc. 20:9-19)*

³³ Dzigo bzodiidz me stib cuent lo zho rëb me:

—Tib meñ name, nroob lbë uv beenbni me lo liuñ me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

³⁴ Zeene goł mëë ne laa nex co gol, pxeel me bla zha ne quia xtsiin me zie lo zha ne quianap liuñ me ga, parne gdeed zha co uv ne rieguial me ycaa me.

³⁵ Per leł bnaaz zho zho, zha ne blooque zho, zha ne bdeedgolp zho, haxta beet zho tib zho.

³⁶ Wbiire pxeel me zla zho, hor cole nzianraa zho pxeel me, per niapse sca psacsi zha co zho.

³⁷ Tibaque zeene pxeelaque me xpëed me, bza guic me rëb me: “Gañse zho xpëed naaw, zon zho miñe gnee me.”

³⁸ Pex nion zho diidz, zeene gon zho xpëed me, rëbcha zho: “ıLëë zha qui nagon guiaannie liu ri! ıGolgotsaa dziuut ne zho, zeena guiaana lo ne!”

³⁹ Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

⁴⁰ ıZha sca dien rzac to gun bizhuan liu co gza zha co, zeene laa me gbire?

⁴¹ Pquiab grē zha ne nac pxoz ne rnabey, ni zha ne nac zha non lo men̄guiedz ga, rēb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien̄ gdeed nex ne rieguial me ycaa me.

⁴² Dzigo rēbchaa me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psēeb zha ne nozaa yu, ni nan̄d zho lēepaa quie co nac mīne rnazdziits yu. ¡Ncuaane gzee zdoo new! Sac Dios bnabey sca goca.

⁴³ Gacnan̄ to ganle, scadaa nagon̄ griece to lad grē zha ne ngab lo Dios, parne gbig zha ne tsoxcopaa gun̄ xtsiin me, zha cole guiaan̄ xlugar to.

⁴⁴ Zha ne tsietsobe lo quie ne raquiet ga, zac zho zig tib ncuaane rac tson̄ tap lē; laa tel̄ lēegaaw tsober lad zho, zac zho zig tib ncuaane die die rac.

⁴⁵ Grē zha ne nac pxoz rnabey ga, ni grē zha farisé, zeene blozh pquiaadiag zho cuent ne bzodiidz me lo zho ga, bien̄ zho zha ga rzeet me.

⁴⁶ Nacne gocladz zho naaz zho me, per bdiebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

22

Zha ne nēd sēeb xnēz Dios

¹ Bzodiidz Jesús stib cuent lo zho, rēb me:

² —Grē zha ne rbedz Dios ygab zho xnēz me, none tsoxco zho gon zho mīne rnee me; sac nenda gdieelo zho zig bdieelo zha ne bredz tib rey co nie zho lo zhilni xpēed me.

³ Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho.

⁴ Wbiire me pxeel me zla zho rëb me: “Goltsietsedz zho, golguiab, laa guielwagw ne yquiin goclole, siguiel zho na guiaad zho.”

⁵ Per ib beencasd zho zha ne pxeel me ga, no zho brieë zie lo xcuaa, no zho brieë zie zhiwto,

⁶ nogaa zho lel bnaaz zho zha co, psacsi zho zho, beet zho zho.

⁷ Zeene gon me sca been zho, blëë me, bnabey me grë xmenguiib me güey zho güeygut zho grë zha ntseeb ne psacsi xmandad me ga, ni bnabey me bzëëg zho guiedz co.

⁸⁻⁹ Blozh ga biire pxeel me zla zho, rëb me: “Laa guielwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguald zho guiaad zho nu.”

¹⁰ Dzigo brieë zho güey zho, miech ne bdzieeltaa zho, zigtaa zha ndzinliw, zigtaa zha ntseeba, grëse zho bredz zho bdzinne zho zho lo lni. Gol hor wagw, biodzëse len yu ndxie miech.

¹¹ Zeene laa rey bzëëb zieneë me lo zho, gon me lad co no tib zha co nacwxabd zho zigne riegual gacwxab zha ne sca rie tib lo guieltsieel.

¹² Dzigo rëbchaa me lo zho: “Bets, ðpe nacne squise luu bzëëb luu nu, bui ganle nacwd luu lar ne bneedz zho niacw luu?”

’Dzese zob zho, rdziöld zho pe guiab zho lo me. Gonse me sca rac zho,

13 bnabey me zha ne nodziib lo mezh rëb me: “Golzobdoo zha rii, golxidoo grop nia zho, grop ni zho, golcuae zho nu goltsieron zho lo ncow nëz ley. ¡Ga nac zaatne rieguial zho, ga gan zho guielnëdox ne no ted zho, goonnë zho, haxta gow lay zho!”

14 'Mincodaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

Pe nonguiel quizh miech contribucion

(Mr. 12:13-17; Lc. 20:20-26)

15 Blalaa zha farisé ne ndxie ga güey zho bnedidz zho dien zha guñgüet zho Jesús cxin me tib diidz, zeena min co yquiaaqui tsiezo zho me lo wxtis.

16 Dzigo pxeel zho bla zha ne nacgrë zho, ni güey zla zha ne racnie Herod gogcza zho. Bdzin zho rëb zho lo me:

—Maestro, ndion no niapse diidzli zienal luu, ni scagaa zeene rseed luu miech, rdziebd luu mine nac diidzli min co rnee luu lo zho.

17 Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguielda ye.

18-19 Bienga me racladz zho guñgüet zho me, dzigo rëbchaa me lo zho:

—¿Pe nan to na rien naa pe no guic to? Masaque rëb to na lëë, znuse guñgüet to naa. Golneedz tib pes ne rguizh to nu ganle.

Dzigo bdeed zho tib pes plat lo me.

20 Blozh ga, rëbchaa me lo zho:

—¿Cho nu, cho lë nu quia lo pes rii?

21 Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mīne rieguiaḷ sca ycaa rey, goldeeda lo rey; scaquegaa mīne rieguiaḷ ycaa Dios, lo Dios goldeeda.

²² Zeene gon zho sca ptsire me lo xtiidz zho, bzee zdoo zho, mazd mīne been zho laa zho wbichese ga, laa zho zey.

¿Pe nli zrieaban miech?

(Mr. 12:18-27; Lc. 20:27-40)

²³ Dze coqew, güey bla zha saducé lo Jesús. Nac zha saducé rīliladz zho zdziṅ dze grieegan miech. Dzigo bdziṅ zho,

²⁴ rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁵ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut biaand xpëed zho. Dzigo ptsieelnia stib bets zho wnaa co.

²⁶ Blozh ga gutaque zha co, pa sē zho nsan mëed. Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me,

²⁷ tibaque zeene yeque me laa me gut.

²⁸ Mīne racladz no gacndion no, ¿chopaa dzigo gac tsieel wnaa co zeene laa zho grieegan? Sac gza gadzse zho ptsieelnia me.

²⁹ Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle rliladzde to zrieelo me gun me ncuaan ro ne gard gan miech.

³⁰ Sac gon zeene gal dze ne laa gre miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac gre anjl ne no gbaa.

³¹ Stiba, ib nli zrieeban mengut. Mod rande to zha zhobnee zaatne raquiet zeene reb Dios:

³² “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, jnacd me xDios mengut, sinque xDios zha mban nac me!

³³ Gre miech ne ndxie ga, zeene gon zho sca ptsire me lo xtiidz zha saduce co, zree zdoo zho.

Xley Dios mine mazdraa non

(Mr. 12:28-34)

³⁴ Gre zha farise ne ndxie ga, gon zho sca psioog Jesus ro gre zha saduce co.

Horco biire gre zha farise co bzodiidz zho stib.

³⁵⁻³⁶ Lad zho no tib maistr ley, dzigo wbig maistr ley co lo Jesus, reb zho:

—Maestro, lo gre xley Dios, bzhiguiel bnë lo naa dien, zpa min nac mine mazdraa non?

Sca reb zho, sac gocladz zho niunguet zho me.

³⁷⁻³⁸ Pquiab me reb me lo zho:

—Lëe mine mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleynie Dios, men nroob ne rnabey luu.” Lëew nac mine mazdraa non, ni lëew glopaa raquiet lo grese ley.

³⁹ No stib miñe rnee: “Bleyne samiech luu zigne rleyne luu luu.” Ye miñ rii nona, meraque lala con miñ glo.

⁴⁰ Zha ne gban zigne rnabey grop ley rii, lëële grë ley ne psañ Moisés ga, lëële grë zhiwseed zha ne biadteed xtiidz Dios ga, zienal zho.

¿Cho xpëëd nac Crist?

(Mr. 12:35-37; Lc. 20:41-44)

⁴¹⁻⁴² Goñ Jesús nzian farisé ndxie lo me ga, nacne bnaabdiidz me lo zho rëb me:

—¿Zha dien rzac to guiaad Meñ ne zëëble diidz ga cxeel Dios? ¿Cho lo xtii grieequia me?

Pquiab zho rëb zho:

—Lo xtii David grieequia me.

⁴³ Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David meñ co, rëb David me nac meñ ne rnabey David. Golgan ganle znu bnee David:

⁴⁴ Rëb Dios lo meñ ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

⁴⁵ Gase nagon telne nli zha xtii David gac Meñ ne cxeel Dios ga, ¿zha nac dzigo rnee David meñ co rnabey David?

⁴⁶ Ni tib zho ib bdzielz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

23

Miñe nac maistr ley grë zho zha farisé

(Mr. 12:38-40; Lc. 11:37-54; 13:34-35; 20:45-47)

¹ Dzigo psilo Jesús bnee me lo grë miech co, ni lo xpëedsuel me,

² rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés.

³ Golguien golgon xtiidz zho, jper nsin golso, ib gunde to mine run zho! Nac zho, ni lalnu rund zho mine rseed zho miech.

⁴ Rio zho rnee zho lo miech, min rii, min rii rñabey ley gun to, ni per ni zha rioxcd zho siquier csilo zho gun zhow.

⁵ jGrë ncuaane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba.

⁶ jZeene rbedz miech zho tib wagw nroob, rdziladz zho zhapaa rzob groļ mezh, niicle len yadoogaaw, zaatne glupaa zha non nac zho, ga rzob zho!

⁷ Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

⁸ Sangue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to.

⁹ Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac PxoZ to, lëë men co no gbaa.

10 Yguibde to sac miech topaa guñctsiñ zho lo Dios, sac loxaque Men ne nole diidz ga cxeel me, men cose zrieelo guñctsiñ zho lo me.

11-12 Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

13' ¡Probsaxe to maistr ley, probsaxe to zha farisé! Lēda i gon noyun to, rzac to noxco to sēeb miech xnēz Dios, per lel noca to sēeb zha ne racladz sēeb. Ni stiba, per ni to nod xnēz me.

14 [¡Probsaxe to! Guielntseeb i gon run to, rio to rlozhd gool to xlay to rzo to ro nēz, ni noque to rla to ncuaañe rapse grē wnaa viud; ib tedsod gon guielnēdox ne ygaa to.]

15 ¡Probsaxe to, rzac to na lēew ga run to! Rio to gui dan rbix to, haxta rded to nisdoo, rquiaguib to dieñ cho sēeb xnēz to ni rlozh ga laa ne ygab zho nēz lo Dios, lel nēz len gabil zienie to zho.

16 ¡Probsaxe to, nac diidz name to noseed miech, ni per ni to riend pe rnee to! Rnee to lo miech: “Zha ne rzeet yadoo ni tel gund zho mine rnee zho, peet nacd ga, per tel gzeet zho grē or ne no len yadoo ni gund zhow, dol ga gun zho.”

17 ¡Nadzpaa nxen to, nadzpaa ncow nac guic to! ¿Niacxe mazdraa non or lo yadoo? Golguien ganle por yadoo, naclay grē or co.

18 Rneequa to: “Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho.”

19 ¡Pe nlipaa rnee to peet riende to! ¿Niacxe mazdraa dzigo non gon que lo pcoog? ¿Pe rande to por lo pcoog co raclay gon?

²⁰ Golguien ganle, zha ne rzeet lo pcoog, yele grë ncuane ndziib low ga quiazeet zho;

²¹ zha ne gzeetgaa yadoo, haxta Diosle ga gon rzeet zho, sac ga rbëz me.

²² Scasaque zha ne gzeet gbaa, zaatne rzoble Dios ga nozeet zho, masaque rriequia me ga rzeet zho.

²³ 'iProbsaxe to maistr ley, probsaxe to farisé! Rzac to na demas nguzobdiidz to lo Dios, rio to haxta grë guizh bitxtil, guizh nizh, guizh comin run to tsii lal, rdeed to tib lala mine rieguial tsiesan to yadoo, laa ley ne mazdraa non zienied guic to gun to mine rnabeya. Nli rieguiala gdeed to grë gon co, per none scaque tsoxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

²⁴ 'iNe nlipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuane row to, ni riende to rriequia haxta tib camell rab to.

²⁵ iProbsaxe to, masaque nac to zig tib plat, zig tib tas ne nëz zhitssew mbe rna, laa nëz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to.

²⁶ Golguien none glo csaan to xquielntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz lena.

²⁷ iProbsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz lena loxaque grë ncuaan biodz, loxaque grë dzit ngutoo nodzë.

28 Sca gon nac to, ne rac to zootxe luu waa nli miech ndzinli nac to, per nēz leñ zdoos to loxaque zhgab ne dien zha yquidie to miech, zha csacsi to miech no to.

29 ¡Probsaxe to maistr ley, probsaxe to farisé! Ni lalnu guielto guiend lo to, rio to rzhixcuuaa to ro xpaas grē zha ne biadteed xtiidz Dios, ni lēēpaas grē pxozgol to beet zho. Dieen peraa run to rquiaalo to rsoladz to zho.

30 Rnee to: “Telne niaca mine nole ne leñ dze co, ndeete ne diidz nsacsi xmenḡol ne grē men rii.”

31 ¡Lēēque to gon nobeero ga, zha nactaa lo dii ntseeb ne ziaad to!

32 ¡Scaque nasca golḡun! ¡Goltsienal grē mine been pxozgol to ga!

33 ¡Miech ngoopdol! ¡Zhin menḡox! Telne csaande to xquielntseeb to i, ib tedsod gon gabil guey to.

34 Grē zha ne cxel naa, zig nac zha ne guiadteed xtidz naa, zha ne nacie Espíritu Sant, zha ne ygaas guielbiini yquiaa zho mine gnabey Espíritu Sant zho, ib tedsod sacsi to zho. No zho gutgazh to, no zho yquiaa to lo cruz, no zho lēēque leñ xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho.

35 Blactaa grē miech ne sca peet xtold ziyut to grē xmenḡol to, psilow desde Abel haxta Zacarí xingan Berequí, men ne beet xmenḡol to zaatne nac gax lo pcoog leñ yadoo. Ni ye to gon zēēb xchen grēse zha co.

36 ¡Gneli naa lo to ganle, grē miech ne gon mban leñ dze rii, grē to zho ygaas guielnēdox ne tsieguial to por grētaa guielntseeb co!

37 ¡Aque tow men Jerusalén! ¿Pe nacne squitaa

nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa, niacnie naa to, nquianaap naa to, zig run nguid rgueedz ma xpëed ma, per bzhiguielde to.

³⁸ Gacnan to sca ganle, nadzetaa gon laa lidz to nu guiaan ngan,

³⁹ sac gandraa to naa, haxta gal dze ne guiab to: “iZha ndzontaa men qui pxeel Dios lo ne!”

24

iNsin golso!

(Mr. 13:1-23; Lc. 17:22-24; 21:5-24)

¹ Laa Jesús zieriee len yadoo grë xpëedscuel me, zeene pcuëezdze zho me, rëb zho:

—Gotsaa gwi ne ganle zha niaataa yadoo rii.

² Blozhse bui zho low, rëbcha me lo zho:

—Niicle squitaa nagon niaaw, per zdziñ dze ne nitlow dib nacsew. Ni stib quie qui guiaandraa zigne squi zhobxcuaaw i.

³ Brie me len yadoo ga grë me zho, laa zho zie nëz Gui Oliv. Bdziñ zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiel bnë lo no dien, i pa hor dzigo gac mine bzeet luu ga? iZha glu zeene laa luu ziaadyoble guiaad? Zeene nitlogaa guidzliu, i zha gacndion no laa dze co ziaadyoble?

⁴ Pquiab me rëb me lo zho:

—Nsin golso, zeena choot yquidiede to.

⁵ Sac nzian zha ne grieequia guiab zho zha nac Men ne zëëble diidz cxeel Dios; ni nzian miech ne yquidie zho.

⁶ Zeene gon to nēzrii nēzrec noxtseeb csilo dil, guiabde to togo lēele dze ne guial naa ga bdziñ; sac niicle noyacle dila, noxtseebragaa pa csilo gaca, led lēdle ne nitlo guidzliu ga.

⁷ Garaa csilo grē dildox, grē guiedz nroob laaw tilnie saguiedz nrooba; grē zha ne rnabey grē guiedz nroob, laa zho tilnie sazha rnabey zho. Nēzrii nēzrec csilo gni grē zhodox, nzian zaatne gañ miech gbin.

⁸ Ni lega loxaque mine rsilosew ga, sac nroobraa guielñe ne gañ miech lozh ga.

⁹ Zeene laa grē ncuaan rii noyac, įnsin goįso! Sac hor co laa miech tsielo to ladznia zha ne csacsi to, haxta zut zho palal to, grēse miech stsidil zho to loxaque ne nac to zha ne no xnēz naa.

¹⁰ Nzian zha ne nole xnēz naa, leñ dze co laa zho gbiche, laa zho csilo lēēque zha glēenie zha ne nacgrē zho, haxta zielo zho zho ladznia zha ne gut zho.

¹¹ Leñ dze co zrieequia nzian zha ne yquidie miech guiab zho xtiidz Dios noteed zho, ni nzian zha ne gliladza.

¹² Grē zha ne nole xnēz naa, zeene gañ zho grētaa guielntseeb, grētaa dol ne quiayun miech leñ dze co, ndal zho gleyniedraa zho Dios dib zdoo zho.

¹³ Per zha ne tiblique gac, gbiched zho lo Dios, niicle tel petaa gañ zho noyac, zha co gac zha ne gdziñ lo me.

¹⁴ Niicle scataa noyac grē ncuaan co, ib none ygaaz Xtiidz Ndzon Dios lo grēse miech, grētaa zaatne ndxie miech laa zho gacnaņa; lozhraa ga dzigo laa guidzliu rii nitlo.

¹⁵ Zeene gañ to zaatne nac Lugar Nda leñ yadoo,

zo tib ncuaaṅe rieguiaḽd so ga, tib ncuaaṅe ziaad gnitlo, zigne bzeet Daniel meṅ ne biadteed xtiidz Dios (zha ne glaba, none guieṅ zho zha naca), hor co golguib dieṅ zha xooṅ to.

¹⁶ Zha ne no grëraa guiedz ne ngab Judé, none xooṅ zho tsie zho dan, ga tsietsolan zho.

¹⁷ Zha ne lëëtaque hor co no glaa guic lidz, none lëëläd xooṅ zho, ib guiabd zho sëëb zho leṅ yu tsiebee zho ncuaaṅe rap zho.

¹⁸ Zha ne quiagaa lo dziin dan, ib guṅd zho tsie zho lad guiedz tsiexi zho xab zho.

¹⁹ ¡Prob grë meṅ wnaa ne lëëtse leṅ dze co zoney xpëëd, meṅ ne quianiegaa mëdyeëṅ ne bii radz!

²⁰ Golnab lo Dios gaṅde to guieḽnë co leṅ mëë ne rac naḽ, dze ne rdziiladzgaa to lo dziin.

²¹ Ne nligaa guieḽnëdoxa. Wlal ne biaan guidzliu haxta lo nadze, gard gaṅ miech tib guieḽnëdox sca, ni gaṅdragaa zhow ted ga.

²² Teḽne csaan Dios nroob dze gac guieḽnë co, ni stib miech rii guiaanḽdraa; per na por grë zha ne bzooblo me sëëb xnëz me, gdeete me diidz gaca nroob dze.

²³ Zigne rne naa ga, leṅ dze ne scataa gaṅ miech grë diḽ co, zha ne gnë lo to: “Goltë nu gaṅle, lëë Meṅ ne nole cxeel Dios ga blanso nu”, gnëgaa zho: “Golt sie nec gaṅle, laa me bdziṅ ga”, gliladzde tow.

²⁴ Sac zrieequia zha ne yquidie guiab zho zha nac meṅ co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dieṅ zha gdeeda diidz yquidie zho zho.

²⁵ ¡Nsin sca golso! Beṅque laa naa nilew lo to.

²⁶ Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: “Goltsie ganle laa me no ga”, gnëgaa zho pa tib len yu ne no me, ni tib xtiidz zho gliladzde to.

²⁷ Sac zeen gal dze ne guiaad me stib, gacda ncuuan ngeets zhlian, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëeb ngbidz, ¿niacxe gand grëse miecha?

²⁸ Zlupaa zeene laa me guiaad; nanle to ganle zaatne nix ma gut, ga rcaalsa pech.

Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

²⁹ Zeene lozhse gan miech grë guielnëdox co, laa lo ngbidz ycow, gziinidraa mëë. Grë mel ne ndziib gbaa, laa ma gliaal; grëraa ncuane no gbaa, masaque nëzrii nëzrec gaca.

³⁰ Horco zlu ganle zeene laa Mgui ne pxeel Dios ga, ziad-zëeb lo xcow con grë guielndzon, con grë poder ne rap me, grëse miech mban gac zho, zoon zho gan zho me.

³¹ Grë xanjl Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

³² Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëë nëëg ziaadgaxle.

³³ Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle.

³⁴ Gneli naa lo to ganle, nzian miech ne mban niina bii zan zho zeene laa grë ncuuan co csilo gac; sac ible ncuanea gaca.

³⁵ Zdziñ dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

³⁶ 'Lëëraasi choot nanñ dien pa dzew, dien pa horgaaw, per ni grë anjl ne no gbaa, per ni naa nanña, loxaque Pxoze naa nanña.

³⁷⁻³⁹ 'Nanle to ganle zha bzhaac miech len dze ne wban Noé, ib bliladz zho xtiidz me. Guxt no zho lo zhilni zho, zha ne notsieelnia, zha ne nobediingaa xpëed, laa dze bdziñ laa Noé bzëëb len barcw; tibaque zeene biala zho biini laa guiedox co nonitlole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle.

⁴⁰ Horco zaatne quia chop mgui lo dziin dan; tib zho tsienal zhits me, stib zho guiaan.

⁴¹ Zaatne quiayot chop wnaa, tib zho tsienal zhits me, stib zho guiaan.

⁴² 'Nsin sca golso, sac gon nanñe to dien pa horpaa guiaad me, benque laa vis racle lo to!

⁴³ Golgan ganle, tel niaca mine gacnan miech laa ngbaan tsieban lidz zho guieel, per nanñ zho dien pa horpaaw; ¿niacxe zaaguies zho? Led sobna zho lëë, nsin nsin so zho.

⁴⁴ Scaque to nagon, none nsin so to, sac gon lega naclew zeen gan to laa me ziaadle.

⁴⁵ 'Golgaṅ ganle, masaque laa to gac nagon zig tib ngundziin ne riaaṅnie ro lidz meṅ ne rquia zho xtsiin.

'Ngundziin ne ndzinli, zeene laa meṅ ne quia zho xtsiin ga grieē, ine niowse guiaaṅ zho guiaaṅnie zho grēraa zha ne no lidz me.

⁴⁶ Zha ne sca guṅ, jwen tsie zho, sac zeene gbire me gaṅ me scataa noxco zho dziin ne pso me zho, ziaṅziuu zho lo me

⁴⁷ haxta so me zho, zha yquiaanap grēse ncuaaṅe rap me!

⁴⁸ 'Tel ngundziin yozhgaaw, miṅe tsienie guic zho guiab zho gbireniobd meṅ ne quia zho xtsiin ga,

⁴⁹ csilo zho csacsi zho grēraa zha ne nac ngundziin, csilo zho ctsieelsa zho grē ngonziu tso zho loxaque gzudz zho, loxaque gowcho zho,

⁵⁰ tibaque zeene gaṅ zho laa me bdzinle.

⁵¹ Zha ne sca guṅ, per peraa dieṅ guṅ me, ib tedsod nroob caxtigw ne cteed me zho, sonēz me zho guey zho zaatne no grēraa zha ne rond diidz, ga tso zho grē zho zha co goonnē zho, haxta gow lay zho lo guielnēdox ne ted zho.

25

Zha bzhaac tsii wnaa nguieg

¹ Blozh ga rēbchaā Jesús lo zho:

—Par sēēb miech zaatne rnabey Dios, masaque naca zig rzēēb miech tib lo lni zaatne noyac tib guieltsieel.

'Tsii wnaa nguieg name, brieē zho ziexinēz zho mgui ne ctsieelnia, tib tib zho bise zho psin win ne rec nceit ne rziini.

2-4 Gaay zho goc ligier pcodzëë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzhense zho psin co scase bi zhow, bid zho nceit ne niodzëraaw.

5 'Goc pa hora rio zhimcaalo zho, ni rdziindaque mgui ne ziexinëz zho ga, tibaque zeen laa zho pquia mcaal.

6 Gol groļ guieela, zeen laa vis rac, laa mgui co ziaadle, zha ne ziexinëz me ga, zac grieë zho tsiedzieel zho me.

7 Lëëled brieë mcaallo gza wnaa nguieg co, psilo zho nozhixcuaa zho zhipsin zho.

8 Zeene gon gza zha nroladz co ygaadraa zhinceit zho, dzigo bnab zho lo zgaay zha co, gdeed zho niip nceit yquiin zho, sac laa zhipsin zho noyuule.

9 Pquiab zho rëb zho: “Grieeloda, sac mine yquinese zhipsin no ziaadnie no. Mazd goltsie zaatne rto zhow, ga goltsiexiw.”

10 Per lo lal ne ziexi zho nceit, laa mgui co bdziñ. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb leñ yu.

11 Dzigo psilo zho, rcaañ nia zho ro yu, rbedz zho mgui co cxal me ro yu sëëb zho.

12 Per bdeete me diidz nzëëb zho, rëb me: “Runbeyd naa to gon, nañd naa dien cho nac to.”

13 'iNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

Zha ne biaanñie dimi

14 'Mgui ne pxeel Dios ga, ziaad gac me zig tib meñ ne no grieë tsie tib viaj zit.

'Tib meṇ name no grieē me tsie me tib guiedz zit, dzigo bredz me zha ne ruṇ dziin lo me, bdeed me palalga xtimi me lo zho guṇdziin zhow leṇ dze ne guieṇd me ga.

15 Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me miṇe rgobey me grieelo zho guṇdziin zho, dzigo laa me brieē laa me zie.

16 'Zha ne biaaṇnie gaay mil pes plat co, güey zho bloonon zhow, beeṇa gan zgaay mila.

17 Zha ne biaaṇnie chop mila, ye zho güey zho bloonon zho dimi co, scaque beeṇa gan schop mila.

18 Laa zha ne pcaania tib mila ga, leḷ güey zho güeyteen zho tib guieer güeyloliu zhow.

19 'Goc bla iza laa meṇ co bdziṇ, dzigo bredz me zho tib tib zho, tsie zho gzodiidz zho dieṇ yo dimi ne biaaṇnie zho ga.

20 'Bdziṇ zha ne pcaania gaay mil pes plat co, bdziṇnie zho xtimi me, rëb zho: "Laa xtimi luu nu goṇ, lëë gaay mil pes ne psan luu lo naa nu, laa zgaay mil miṇ rii nac miṇe bdziniaaw."

21 Rley me rëb me lo zho: "iZha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac goṇ lo palalse dimi ne psan naa lo luu ga, bioxco luu zaacse beṇdziin luuw. Nana goṇ, nroobraa miṇe gnedz naa guṇdziin luu. iNa bded, zeena ygaa luu grë guielbley ne quaiyac nu!"

22 'Blozh ga, bdziṇaque zha ne biaaṇnie chop mila ga, ye zho laa zho bdziṇnie xtimi me, rëb zho: "Laa xtimi luu nu goṇ, lëë chop mil pes ne

psaṅ luu lo naa nu, laa schop mil miṅ rii nac miṅe bđziniaaw.”

²³ Pquiab me rēb me: “¡Squiw nagon! Rley naa ran naa squitaa ndzinli luu, squitaa nguzobdiidz luu lo naa; sac goṅ lo palalse dimi ne psaṅ naa lo luu ga, bioxco luu zaacse beṅdziin luuw. Nana goṅ, nroobraa miṅe gnedz naa guṅdziin luu. ¡Na bded, zeena ygaa luu grē guielbley ne quaiyac nu!”

²⁴ Zeene bđziinta zha ne biaannie tib mila ga, rēb zho lo me: “Nli beṅdziind naa xtimi luu, sac naṅle naa zha nac luu, niicle paraa niuṅdziin naaw, grēse miṅe niuṅa gan lo luu niaana;

²⁵ gane mazd bialoliu naaw. Tib mil naca bneedz luuw, ledaaw nu.”

²⁶ Blēe guic me, rēb me lo zho: “¡Biche nu, paat rquiind naa miech yozh, miech nroladz ne squi nac! Conque naṅle luu sca nac naa,

²⁷ ¿pex nac dzigo waa bioxcod luu maase mbe-diin luu dimi qui, ndziniaaw palal ncaania naaw niina?”

²⁸ Dzigo rēbchaa me lo zha ne ndxie ga: “Ni-inagazh goṅcob tib mil pes qui lo zha qui, goṅdeeda lo zha ne ziaadnie tsiw i.

²⁹ Sac zha ne rioxco ruṅdziin ncuane rcaania zho, zacnroobraa ncuane yquianie zho. Laa zha ne squi nac, haxta miṅe pcaaniale zho, zdiooba lo zho.

³⁰ Goṅxeṅ zha yozh qui, goṅtsiesañ zho lo ncow nēz ley. Ga gaṅ zho guielnēdox ne tsieguial zho, ga goon zho haxta gow lay zho.”

Zha guṅ Jesús guielwxtis

³¹ Blozhse bzodiidz Jesús cuent co lo zho, rēbchaa me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanjI naa, zlu grëtaa guielndzon ne rap naa, laa naa sob lo xcan ne raguial naa soob naa.

³² Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho.

³³ Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

³⁴ 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Gołtë grëse to, to ne nac to zha ne nziuu lo Pxoz naa. Gołted zeena ycaania to zaatne cuëz to, ible par to bzaa mew desde zeene bzaa me guidzliu.

³⁵ Sac zeene pcaabedz naa, bneedz to ncuaane dow naa; zeene bnab zhis naa, bneedz to ncuaane go naa; zeene bial naa ladz to, bneedz to lidz to blëz naa;

³⁶ zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to biaadgan to naa."

³⁷⁻³⁹ See zdoo zho gnë zho: "¿Per pa hor bneedz no ncuaane doow luu, ncuaane go luu, pa hor bneedz no zaatne blëz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguiib?"

⁴⁰ 'Dzigo guiep naa lo zho: "Gzobtaa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to."

⁴¹ 'Laa zha ne ndxie nëz revés, hor co laa naa gzonëz zho, guiep naa lo zho: “¡Golbiche lo naa nu, miech ndziibdee! ¡Golsë lo guidox ne riegual to, zaatne no guey mendox grë xanj! ma!

⁴² Sac gon, bio dze pcaabedz naa ni bneedzde to ncuane niow naa; bñab zhis naa, ni bneedzde to pe nie naa.

⁴³ Bial naa ladz to, ni bneedzde to zaatne mbëz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa.”

⁴⁴ 'Squiab zho gnë zho lo naa: “Per pa hor bdzion no luu rcaabedz luu, rnabгаа zhis luu; pa hor bdzion no guiend pa cuëz luu, guiend lar ne gacw luu; pa horgaa bdzion no no luu ladzguiib, nixгаа luu rzacnë luu.”

⁴⁵ 'Dzigo guiep naa lo zho: “Grëse vuelt ne bzoliaadz to niun to xyudar zha ne no xnëz naa, bzoliaadz to niegan to zho niicle zha ne mazdraa wina, rriequia naa ga sca been to.”

⁴⁶ 'Horco grëse zha co laa zho guey lo guidox ne gdzindraa dze griee zho; laa zha ne bioxco wban zigne rnabey naa, grëse zho laa zho yгаа tib guielmban ndzon ne gdzindraa dze lozh.

26

*Bnediidz zho dien zha gnaaz zho Jesús
(Mr. 14:1-2; Lc. 22:1-2; Jn. 11:45-53)*

¹ Zeene blozh sca bnee Jesús lo grë miech co, dzigo rëbchaа me lo xpëedscuel me:

² —Nanle to ganle schopaque ngbidz, laa lni Pascw csilo. Naa ne nac naa Mgui ne pxeel Dios,

lo lni co gon̄ gnaaz miech rii naa, tsielo zho naa ladznia zha ne yquiaa naa lo cruz.

³ Grē zha ne nac pxoz ne rnabey, grē maistr ley ni grē zha ne nac men̄ non lo men̄ guiedz Israel, lēētaque hor co laa zho ndxie lidz Caifás, men̄ ne nac pxoz nroob.

⁴ Laa zho ndxie ga, nonediidz zho dien̄ zha grieelo gnaaz zho Jesús, gut zho me, per tib mod ne grieelod glisqui men̄ guiedza.

⁵ Rnee zho: “Lēēraasi choot gnabeyd ygaa me merpaa dze lni, zeeṇa gacntseebd men̄guiedz.”

*Pchoob tib wnaa nceit nex guic Jesús
(Mr. 14:3-9; Jn. 12:1-8)*

⁶ Betain ga no tib men̄ ne biac lo guiedz lepr, lē Simón. Lēētaque no Jesús lidz men̄ co,

⁷ zeeṇe bdziṇ̄ tib wnaa bdziṇ̄nie tiblo nceit nex, nosew tib len̄ ncuaan̄ win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús.

⁸ Zeeṇe gon̄ xpēēdscuel Jesús sca been̄ wnaa co, blēē zho, rnee zho:

—¡Pa rieguiala squi pxin̄ zhlē wnaa qui nceit qui!

⁹ Tel̄ niaca miṇe ndow, pe zhidaa dimi ne nguizh zhow, nquiinpaa dimi co ngaaza lo grē zha ne guiend̄ pe yquiin.

¹⁰ Gon̄ Jesús sca rac zho, dzigo rēbchaa me lo zho:

—¿Pe nacne rlēē to lo wnaa qui? Goṷsaan me. Par naa nroob non miṇe been̄ me i.

¹¹ Tel̄ nli lēē racladz to gon̄ to xyudar zha ne guiend̄ pe yquiin, zac ygad to lo zho stib dze, sac tibaque ran̄ to zho; san̄gue naa zhile laa naa gbiche lo to.

¹² Led pxin zhlöd wnaa rii zhinceit me, sac gon rriequia laa me bzhixcuaale xcuerp naa nu gal dze ne ygueetsa.

¹³ Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

Güeyto Judas Jesús

(Mr. 14:10-11; Lc. 22:3-6)

¹⁴ Lo gza tsiipchop zha ne nac xpëëdscuel Jesús ga, brieë zha ne lë Judas Iscariot güeyzodiidznie Judas grë zha ne nac pxoz ne rnabey,

¹⁵ rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat.

¹⁶ Nacne psilo Judas noguib Judas dien zha gdeeda diidz csañ Judas me lадznia zho.

Dowxtseenie Jesús xpëëdscuel me

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëëdscuel Jesús lo me dien pa lo racladz me tsiegunlo zho ncuaane gowxtseenie me zho wdze co.

¹⁸ Dzigo rëbchaa me lo zho:

—Nanle to ganle cho lidz zrieelo gdzin ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdzin, gane racladz me lidz luu nu diowxtsee no nawdze grë no me.”

19 Dzigo laa zho zie. Güey zho zaatne pxeel me zho ga, ga beenlo zho xtsee co.

20-21 Wdze co, laa me no xtsee grë me zho, zeene bnee me lo zho rëb me:

—Gacnañ to ganle, lëëque tib to gon tsielo naa ladznia zha ne gnaaz naa nawdze rii.

22 Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gon min co? ¿Pe naaw?

23 Pquiab me rëb me lo zho:

—Zha ne gan to csëëb xcuun leñ xquien naa, lëë zho ga.

24 Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, jprobsaxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

25 Yeze Judas rnabdiidz lo me rnee Judas:

—Maestro, ¿pe goon naaw ye?

Rëbchaa me lo Judas:

—Luuw gon Judas, luu güeyto naa.

26 Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëë xcuerp naa i gon.

27 Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui,

28 sac lëë xchen naa i, mine no gzhiee par guiaanmbe grë miech lo xtol zho sëëb zho xnëz Pxoaz naa, sac lëë stib mod cub nu psañ me parne sëëb miech xnëz me.

29 Lëe lultm vuilt nu guie naa vin rii, sac zhaale stib vin cub ne guie naa gal dze ne guienie naa tow zaatne rnabey Pxoz naa.

Dzigo psilo me biilnie me Dios gza me zho.

Bzeet Jesús zha gun Pedr

(Mr. 14:26-31; Lc. 22:31-34; Jn. 13:36-38)

30 Blozhse biilnie zho Dios, laa me briege ga gza me zho, laa me zienie zho nöz Gui Oliv.

31 —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nözrii nözrec gliaal mëcwxiiil.”

32 Miñcopaa nagon gun miech naa, per zeene laa naa grieegan glole naa ga Galilé, ga cuöz naa to.

33 Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

34 Pquiab me rëb me lo Pedr:

—Gneli naa lo luu ganle, guieel riigazh, gardle ycuudz gall, laa luu csale tson vuilt guiab luu runbeyd luu naa.

35 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdsuel me.

Bzodiidznie Jesús Pxoz me Getsemaní

(Mr. 14:32-42; Lc. 22:39-46)

36 Zeene bdziñnie Jesús zho zaatne lë Getsemaní, dzigo rëbchaa me lo zho:

—Nuse nagon golsob, laa naa ga gazodiidznie naa Pxoz naa.

³⁷ Horco psilo mban rac zdo me, riabguiel_nē me, dzigo bredz me Pedr, ni grop xingan Zebedé, bzēnie me zho palal

³⁸ dzigo rēbchaa me lo zho:

—Mban rac zdo naa, zootle zig zet naa lo guiel_nē rii. Nuse nagon gol_guiaa_n, per gol_sobna.

³⁹ Bzē me spalal, dzigo p_quiitsg_zhib me haxta bdzi_n lo me lo liu; psilo me bnab me lo Dios, rēb me:

—Papá, laa naa rnab lo luu, tel_ne zala zdo luu, bzhiguiel_l psilaa naa lo grē guiel_nē rii. Mi_n rii rnab naa lo luu, per tel_ne grieeloda, mi_ne gnētaa luu, mi_n co gac.

⁴⁰ Zeē_ne guso me, güey me zaatne b_iaa_n gza tso_n zha co, go_n me laa zho nixguesle; dzigo rēbchaa me lo Pedr:

—¿Pe ni palal blēbde to nzobna to?

⁴¹ Gol_sobna, gol_nab lo Dios zeē_na y_quiild mē_dox to. Niicle ne squi lēbdraa xcuerp to sobna to, per gol_nab lo Dios, sac go_n mi_n co nac mi_ne racladz zhiespí_ritu to.

⁴² Dzigo güey me stib, güeyzodiid_znie me Dios; scaque mi_ne bnab me glo mi_ncoque bnab me.

⁴³ Zeē_ne wbiire me bdzi_n me lo zho, go_n me laa zho nixgueslaque, sac lēbdraa zho mcaal_l.

⁴⁴ Wbiire güey me güey_nab me lo Dios, scaque mi_ncoque bnab me.

⁴⁵ Zeē_ne laa me wbiretaa bio_n v_uelt co, rēbchaa me lo zho:

—Lēew nagon, zacle na gaguies to, zacle gdziladz to. Naa ne nac naa Mgui ne p_xeel Dios, laa hor nagon bdzi_n zeē_ne laa grē miech ntseeb rii guiadnaaz naa.

⁴⁶ Gołtsieso, zeena zio ne; sac goṅ laa zha ne glu naa lo zho ziaadle nu.

Bnaaz zho Jesús

(Mr. 14:43-50; Lc. 22:47-53; Jn. 18:2-11)

⁴⁷ Laa Jesús bii quianeeque, zeene laa Judas (tib zha ne nac xpëëdsuel me) bdziṅ, bdziṅnie Judas tib dzoon zha ne pxeel grë pxoz ne rnabey, ni grë zha ne nac zha non lo meṅ guiedz Israel. No zho nzheṅ spad, nogaa zho nzheṅ yag.

⁴⁸ Biaaṅniele Judas zho diidz zha glu Judas cho nac Jesús, rëb Judas lo zho zha ne gaṅ zho gow Judas bzhid cuas, lëe me ga, ligier so zho gnaaz zho me.

⁴⁹ Zigne bdziṅ Judas pquiaabdiuzh Judas me, blozhse ga wbig Judas dow Judas bzhid cuas me.

⁵⁰ Dzigo rëbchaa me lo Judas:

—Judas, ¿pe ziaadguṅ luu nu?

Lëëlëd wbig be grë zha co, bzheṅ zho me.

⁵¹ Horco biet tib zha ne rzënie me ga, bdoḅ zho zhispad zho psilaa zho tib niaw, bliengaa zho diag tib zha ne rquia xtsiṅ meṅ ne nac pxoz nroob.

⁵² Dzigo rëb Jesús lo zha ne pquiaaw ga:

—Blootsow zhispad luu, ib guṅdraa luu squi cob luuw. Sac goṅ zha ne rdiḷ con spad, noxtseeb ne low guet zho.

⁵³ ¿Niacxe naṅ to na grieelod gnab naa lo Pxoḅ naa niina cxeel me tsiipchop partid xanjḷ me guiaadla ne nu?

⁵⁴ Per telne sca guṅ naa, ¿zha dzigo gac miṅe zhobnee lo Xtiidz Dios, zaatne raquiet miṅe noyac nu?

⁵⁵ Dzigo rëbchaa me lo grë zha ne bdziṅ ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa miech len yadoo, ¿pe nacne bnaazde to naa ga?

⁵⁶ Per ible laa grë ncuaan rii gon noyac, zeena greequia grë mine bzeet grë zha ne biadteed xti-idz Dios lo miech padzeela.

Horco grëse zha ne nac xpëëdsuel me laa zho bzhoon, tipse me psan zho ga.

Güeynie zho Jesús lo zhiwxtis zha Israel

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Ga brieenie zho Jesús bdzinnie zho me lidz Caifás, men ne nac pxoz nroob. Grë zha ne rnabey lo menquiedz Israel, laa zho ndxiele ga.

⁵⁸ Ye Pedr maase zit zit nal Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dieñ zha gun zho Jesús.

⁵⁹ Grë pxoz ne rnabey, grë zha ne nac zha non lo menquiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me.

⁶⁰ Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho,

⁶¹ rëb zho:

—Bdziñ no gon rnee me laa me ctixche yadoo ne zob lad guiedz nu, zaatne riodziñ ne Dios, lozh ga tsonaque ngbidz gzaalo me stiba.

⁶² Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nlida ye?

⁶³ Gon pxyz nroob co rquiabduque Jesús, rëbchaa me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

⁶⁴ Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zob cue Dios nëz derech, ni zeene laa naa guieet gbaa zialzëëb naa lo xcow.

⁶⁵ Horco ptsiez pxyz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios.

⁶⁶ Nana waa, ¿pe gnë to zha dziuun ne me?

Pquiab be zho rëb zho:

—¡Ib rieguial guet me!

⁶⁷ Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me,

⁶⁸ rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

Rëb Pedr runbeyd Pedr Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëë rzënie Jesús, meñ Galilé ne bdziñnie zho i?

⁷⁰ Per bneelid Pedr. Squi zob grë zha co, rëb Pedr:

—Rieñd naa dieñ cho meñ rnee luu.

⁷¹ Laa Pedr ziele nëz ro puert ne quia ro nëz, zeene gon stib ndzooop ne quia dziin ga Pedr, rëb ndzooop lo zha ne ndxie ga:

—Ye mgui qui gon nacgrë meñ Nazaret ne bdziñnie zho i.

⁷² Scaque bneelid Pedr, haxta rzeet Pedr Dios rëb Pedr runbeyd Pedr me.

⁷³ Wdzeepaaw, rëb zha ne ndxie ga lo Pedr:

—Ne nligaa ye luu rzënie meñ ne bdziñ i. ¡Rlupaa name zig rnee zha nëz Galilé rnee luu!

⁷⁴ Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidzlid nu rne naa, maase cuibdee naa.

Loxaque blozh sca brieë ro Pedr zeene laa tib gall pcedz.

⁷⁵ Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuelte rëb luu runbeyd luu naa.” Dzigo mbanse rac Pedr. Brieë Pedr ga, psilo Pedr biin Pedr guieñe co.

27

¹ Ziadyiinile liuw, wbiire pcaalsa grë pxoz rnabey, grë zha non lo menquiedz, bnediizd zho dieñ zha gnabey zho guet Jesús.

² Blozhse bzodiidz zho, dzigo laa zho bzobdoo me blee zho me ga ziesañ zho me lo Pilat, meñ ne nac gobernador.

Gut Judas

(Mr. 15:1; Lc. 23:1-2; Jn. 18:28-32)

³ Laa Judas Iscariot zha ne pto Jesús ga, zeene bin Judas laa zho rnab guet me, lëëlöd güey Judas lo grë pxoz rnabey co, lo grë zha non lo menüguiedz ga, zietsire Judas dimi ne bdiizh zho Judas ga. Mban rac Judas,

⁴ bdzin Judas rëb Judas lo zho:

—Naraa rien naa lëda nu beñ naa. ;Tib dol nrooble nu, znu bialto naa tib men ne peet xtold!

Pquiab zho rëb zho:

—;Miñcota gōñ ndiond no! ;Xcuentzhe luu ga!

⁵ Horco pchel Judas dimi co len yadoo. Lo guielnë co brieë Judas ga güey Judas lëëque Judas pxiiyan Judas.

⁶ Grë zha ne nac pxoz rnabey ga, güey zho ptop zho dimi co. Per blozh ga, rien zho dien zha gun zhow.

—;Zha dziuun ne dimi rii? —rëb zho—. Telne guiaana yadoo, per rdzieelda, sac gōñ xchen tib miech bdzëw.

⁷ Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne ríaa grë ncuaan psin ne rquiin; parne lo liu co ygueets grë zha zit ne guet Jerusalén.

⁸ Nacne brieelë liu co “Liu ren”, ni sca runbey zhow len dze rii.

⁹⁻¹⁰ Ga brieequia miñe bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho tib lë liu, zaatne rdieen yu ne ríaa grë ncuaan psin ne rquiin. Sca në Dios lo naa.”

Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

¹¹ Bdzinnie zho Jesús lo Pilat, ga bñabdiidz Pilat lo Jesús rëb Pilat:

—Bnë dien, ¿pe nli luu nac zhirey zha Israel?

Pquiab me rëb me:

—Nliw.

¹² Grë zha ne nac pxoz rnabey ga, ni grë zha ne nac zha non lo menquiedz, rzadraa ncuaane rquiaqui zho me; per ni tib diidz rtsired me lo zho.

¹³ Dzigo rëbchaa Pilat lo me:

—¿Pe nacne rquiabd luu? ¿Pe ib rond luu grëtaa ncuaane rquiaqui zho luu i?

¹⁴ Bzee zdoo Pilat gon Pilat, ible rquiabd me.

¹⁵ Gzobse iz, zeene ral lni Pascw rnabey Pilat rlaa tib zha ne no ladzguiib, zha ne gnabtaa menquiedz laa.

¹⁶ Leñ dze co no tib zha ntseeb ladzguiib lë Barrabás, zëeb xtiidz zho.

¹⁷ Nacne rëb Pilat lo grë zha ne ndxie ga:

—¿Cho racladz to csilaa naa? ¿Pe silaa naa Barrabás, te silaa naa Jesús ye, men ne nac diidz pxeel Dios lo to?

¹⁸ Sca rëb Pilat sac bien Pilat loxaque porne ndal miech nobig lo Jesús min co ne rlëenie zho me, bnabey zho bgaa me.

¹⁹ Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tseeel luu: bzhiguiel me peet gund luu men qui, rlu peet xtold me; sac nieewdze me nroob ptseb mcaal tseeel luu.

20 Grē zha rnabey co, bio zho pquuil zho menguiedz gnab zho csilaa Pilat Barrabás, ni gnab zho guet Jesús.

21 Zeene wbiire Pilat bnabdiidz Pilat stib, dien chopaa racladz zho laa, grēse zho nguiedz pquiab be zho, rēb zho:

—¡Barrabás psilaa!

22 Dzigo rēbchaa Pilat:

—Men ne waa nac diidz pxeel Dios lo to nu, ¿zha guñ naa me?

Pquiab zho rēb zho:

—¡Bnabey yquia me lo cruz!

23 —¿Per pe nacne yquia men rii lo cruz? —rēb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz.

24 Gonse Pilat rquiaadiagd zho xtiidz me, lel mazdraa rac zho, dzigo bnab me nis, squi ndxie zho bdiib me nia me, rēb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

25 Pquiab be zho rēb zho:

—¡Peet nacd ga! ¡Zhits no grē xpēed no cuib dol co, na no guiotizha!

26 Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psañ Jesús ladznia menguiib ne tsiequiaa me lo cruz.

27 Biire grē menguiib co bzēēbnie zho me nēz len yulow, ga pcaalsa grēraa menguiib ne nacgrē zho, briñ zho igose me.

28 Blee zho xab me, bgacw zho me tib lar nizhnie nlaan, zig rna lar ne racw grë rey,

29 bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquiitsgzhìb zho lo me, rnee zho:

—¡Golwi ganle zha ractaa zhirey zha Israel!

30 No zho rtsuc zho lo me, rgob zho goobgui ne no nia me ga, rdeed zhow guic me.

Güeyquiaa zho Jesús lo cruz

(Mr. 15:21-32; Lc. 23:26-43; Jn. 19:17-27)

31 Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brieenie me ga zienie zho me zaatne yquia me lo cruz.

32 Nëz zienie zho me bdzieel zho tib men Ciren lë Simón, bnabey zho men co bi me zhicruz me.

33 Zeene bdziñ zho zaatne nac “Gui Beerguic Ngutoo” (Gólgota),

34 ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

35-36 Blozhse pquiaa zho me lo cruz, bzhen zho tib xab me pchug zhow biaanñie zho tib lëgaw, laa stiba bio zho rif; dzigo laa zho bzob ga, bzobnap zho.

37 Guic zhicruz me, ga pquiaa zho bla lan diidz zaatne rnee: “LËË JESUS NU, MEN NE NAC ZHIREY ZHA ISRAEL.” Sca pquiaa zho, sac miñco pquiaqui sca pquiaa zho me lo cruz.

38 Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me.

³⁹ Grēse miech ne rdedtaa ran zho laa me quia ga, rzhidznie zho me, haxta rdzi zho guic zho

⁴⁰ rnee zho lo me:

—Led rēb luu lēē laa luu ntsil yadoo, ni tsonaque ngbidz nzaalo luu stiba, ¿pe nac dzigo rrieelod luu guieet luu i? Telne nli Xpēēd Dios nac luu, biet lo qui.

⁴¹ Scaque grē pxoz rnabey, grē maistr ley, grē zha farisé ni grē zha ne nac zha non lo menquiedz, rzhidznie zho me, rnee zho:

⁴² —Stib miech scataa beenguiaac me, stib miech scataa bla me, ¿pe nac dzigo rrieelod me gla me me? ¿Goon me name nac zhirey ne, guiet me i sca zho; zeena dziuunbey ne men rnabey nac me!

⁴³ ¿Conque tant rnalo me Dios, haxta rnee me Xpēēd Dios nac me, guiaadsilaa Dios me i nazho!

⁴⁴ Ye ngbaan ne quiagza me lo cruz ga, mincoque rbidzgo zho lo me.

Gut Jesús

(Mr. 15:33-41; Lc. 23:44-49; Jn. 19:28-30)

⁴⁵ Zig groł dzew, tibaque zeen goc tib ncow dipse lo guidzliu, haxta las tres biala biini stib.

⁴⁶ Horco nguiedz zēēb tsi Jesús, rnee me:

—Elí, Elí. ¿Lama sabactani?

Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

⁴⁷ Zha ne ndxie ga, zeene bin zho sca rbedz me, no zho rēb Lí, men ne biadteed xtiidz Dios padzeela, men co rbedz me.

⁴⁸ Dzigo rias tib zho güeygadz tib lē zhiil lo nziu bla, bzoob zhow tib guic goobgui pquiaa zhow ro me.

⁴⁹ Laa zla zho rnee:

—Psaan, nu dzian ne dien pe ziaad Lí guiaadlit Lí me i.

⁵⁰ Tibaque zeene pquiaa me stib redz nroob, znuse blozh me.

⁵¹ Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbila,

⁵² nzian ro baan grë zha ne bnalo Dios mazd padzeela bzhial.

⁵³ Zeen gol dze ne brieeban me, ye zho laa zho brieeban, brie zho len baa, bzëeb zho lad guiedz; nzian miech ne gon zho.

⁵⁴ Grë menguiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuane goc ga, per nli bdzieb zho.

—¡Ne nlipagaa —rne zho—, Xpëed Dios nac men qui!

⁵⁵ Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé.

⁵⁶ Lad co no Marí Magdal, Marí tsiel Zebedé, ni Marí ne nac xniala Jacob grop José.

Bgueets Jesús

(Mr. 15:42-47; Lc. 23:50-56; Jn. 19:38-42)

⁵⁷⁻⁵⁸ Zhile sëeb ngbidza, zeene bdzin tib mgui lë José lo Pilat, bnaab me diidzbey tselit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

⁵⁹ Dzigó güey José. Blozhse blit José me lo cruz, laa José neyle tib lë lar cub, pchel José me lar co,

⁶⁰ güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey.

⁶¹ Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

⁶² Biini liu co, pcaalsa grë pxoz rnabey, grë zho zha farisé, güey zho lo Pilat,

⁶³ rëb zho:

—Gūn luu dispensar, laa no ziaadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieegan.

⁶⁴ Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieegan. Nanle luu ganle, tel gac min co, cho gnë peraa gzhixcuaa zho.

⁶⁵ Dzigó rëbchaa Pilat lo zho:

—Telne sca racladz to, laa tib partid menquiib ndxie i. Goltsienie zho, golguiab lo zho yquiaanap zhow tel zha racladz to.

⁶⁶ Dzigó laa zho zie zienie zho grë menquiib co. Bdzin zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menquiib co yquiaanapa.

28

BRIEEBAN JESUS

(Mr. 16:1-8; Lc. 24:1-12; Jn. 20:1-10)

¹ Zna dze goc dze ne rdziiladz zho lo dziin ga, biini liu, dze ne rsilo zhmäl, silgaw zie Marí Magdal grop me stib Marí co zieso zho ro baan Jesús.

² Lëëtaaque hor co bni tib zhodox, lo zho co biet tib xanjł Dios gbaa bđob me quie nroob ne nioog ro baa co, bđiix mew tib lad, bzobga me lada.

³ Masaque rlu me zigne rlu belye, xab mew, nquitsbie rnaw, zig rlu zaatne ndxie guieg.

⁴ Grë menġuıib ne quianap ro baa ga, zeene gon zho anjł co, per nli bđzieb zho, rzhidz zho. Lo dzeb co, pcowgagh zho, grëse zho biab liu.

⁵ Zeene laa grop wnaa co bđziñ, rëbchaa anjł co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguıb to.

⁶ Per guıendle me nu, įlaa me brieebanle zigne bneele me ga! Gołwi ganle nu nac zaatne pxob zho me.

⁷ Niinagagh gołtsie gołtsienie diidz lo xpëëdsuel me, gołguiab lo zho laa me brieebanle. Galilé me cuëz me zho, ga gan zho me. Laa to nanlew nasca.

⁸ Lëëläd brieë grop wnaa co ga, rias zho laa zho zienie diidz lo xpëëdsuel me; lala rdzieb zho, ni lala rley zho.

⁹ Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquıitsgzhıb zho lo me, bdeedz zho ni me.

¹⁰ Dzigo rëbchaa me lo zho:

—Gdziebde to. Gołtsie gołtsienie diidz lo grë zha bets naa, gołguiab lo zho tsie zho Galilé, ga gan zho naa.

¹¹ Horcoraa laa bla zhaguıib ne pquianap ro baan Jesús ga bđziñ lad guiedz. Güey zho lo grë

pxoz rnabey, bzodiidz zho zha gon zho bzhial ro baa co.

¹²⁻¹³ Dzigo pcaalsa grë pxoz co grë zho zha ne nac zha non lo menquiedz, dien zha gun zho. Nacne biaan zho diidz, mazd gdeed zho dimi lo grë menquuib co, parne gneelid zho, sinque guiab zho, segur xpëedscuelaque me güeybee me len baa, per biend zhow sac nixguies zho. Nroob dimi bdeed zho lo grë menquuib co,

¹⁴ rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

¹⁵ Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque bliladz zho nli sca goca, jni haxta lo nadze sca zienie guic zho!

¹⁶ Zeene bdzin dze ne gdzieelo Jesús xpëedscuel me nëz Galilé, brieegza tsiptib zha ne bzo gaxpaa lo me ga, güey zho nëz co; bdzin zho guic gui ne rëble me ga gdzieelo me zho.

¹⁷ Zeene gon zho me pquitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic.

¹⁸ Dzigo wbig me lo zho, rëb me:

—Laa to gonle nasca naa rnabey. Grëse ncuane no gbaaw, nogaa guidzliuw, ladznia naa psan Pxoza naaw.

¹⁹ Niina nagon, laa naa rсан diidz lo to: goltsie dipse lo guidzliu, goltsieseed miech gac zho zha ne sëeb xnëz naa, golchoobnis zho, golguiab lo zho lëe min co rnabey Pxoza naa, rnabey naa ne nac Xpëed me, ni rnabeygaa Espíritu Sant.

²⁰ Go^lseed zho gban zho, grëse minë bnabey naa to gun to. Min co rsaⁿ naa diidz lo to gun to; ni gacnaⁿ to gan^{le}, ib csaand naa to, gzataa dzew niicle haxta dze ne nitlo guidzliuw, naa gacnie to.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

5317ca58-7555-5e4c-a420-e1e9210e2df2